



21291

III

Mag. St. Dr.

P

Niklaus

Episcopus Lincoriensis.

Kanon Andreae: Sollemnis in Pontifi-
cem inauguratio D. Nicolai Praemorski
Episc. Lincoriensis.

PANEG. et VITAE

Polon. Fol.

N. 1035.

Biblioteka Jagiellońska



stdr0002003

SOLENNIS

IN PONTIFICEM

IN A VG V R A T I O

ILLVSTRISSIMI & REVERENDISSIMI DOMINI

D. NICOLAI

IN PRAZMOW,

PRAZMOWSKI,

EPISCOPI LVCEORIE NSIS

ET BRESTENSIS,

CANCELLARII REGNI,

Festo Faustoque Die

DEDICATIONIS BASILICÆ

SALVATORIS

A U S P I C A T O

T R A N S A C T A.

Anno VNCTI in Salutem Humanam

PONTIFICIS.

M.DC. LX.IV. V.IDVS NOVEMBRIS.

Operâ & obsequio,

P. ANDRÆ KANON è Societate IESV,

ILLVSTRISSIMÆ & REVERENDISSI-

MÆ CELSITVDINISVÆ

Ex antiquo Deuoti ac Deuincti.

VARSAVIÆ, Apud Viduam & Hered: Petri Elert S. R. M. Typogr.

Lib. 39 Non. ab Ad. Rde. Guev. Pavia. Polo. nifi

Compleuit Manus eius, & Vnxit Illum O-
leo Sancto: & dedit Illi in Præceptis suis
POTESTATEM IVDICIORVM.
Et in Lege sua **LVCEM** dare Israel.

Ecclesiastici 45.

TVnc verissimè iudicatur: Meruit quis Hono-
rem necné: cùm adeptus est. *Traiani Panegyristes.*



**IN ARMA GENTILITIA DOMVS PRA-
ZMOVIORVM (vulgò BIELINAM.)**

**A Rege BOLES LAO AV DACE indita: à BOLES LAO
KRIWOVSTIO aucta.**

ANNO REGIS REGVM 1103

*Iure BOLES LAVS Mauortia contulit ARMA
O PRÆSVL, Pröanis Continuata Tuis.*

*Ad Martem Cienitis, conferre quid aptius AV DAX
Posset? quàm Solida Landis, Equestre Decus?*

*Aurea Militia sunt Hæc Documenta: Quòd olim
Non Auro, at Ferro Miles habebat opus.*

Linum Histor. lib. 9. Decad. 1.

A D

JLLVSTRISSIMVM ET REVEREN-
DISSIMVM DOMINVM,

D. NICOLAVM

7 N P R A Z M O W,

P R A Z M O W S K I,
EPISCOPVM LVCEORIENSEM,
ET BRESTENSEM,
CANCELLARIVM REGNI.

&c. &c.

JLLVSTRISSIME ET REVERENDISSIME
NEO-PONTIFEX.



Ngens & Illuſtre HONORISTVI TEMPLVM, cui
nuper Summam Architecta Virtus adiecit Manum, vide ad Quos
& Quantos attinet, vel Religionis iure, vel nomine Maieſta-
tis. Debet, Primum velut Lapidis iactum Auguſto Suffragio
Beneficentiſſimi Principis. Debet, Delineati Operis Ideam, Arbi-
tra Regnorum Templorumq; Roma: Impenſas longo Tempore: Stru-
ctura Materiem Tibi: Formam Illuſtriſſimo iuxta ac Amiciſſimo CONSECRA-
TORI TVO: Titulum (quod ego omnibus antepono Felicitatibus) acceptum tribuis
SALVATORI, vna Bonarum Mentium Tempia, propenſius auguſtiuſq; inhabi-
tanti, quam Lapidum Moles operoſe ſumptuoſeq; eductas. Ergo ille, Dedicata ſuo
Numini & Nomini Conſtantinianâ Baſilicâ Laterani; in hanc Enceniantis Glorie
Ædem intulit ſeſe, ne Hodiernæ non adeſſet præſſetq; Lætitia, cuius Ipſe & Auctor
& Cauſa ſit. Vnde enim Sacra Magiſtratum Inſignia? Sublimes Infula? Honorum
præcellentia, Pacata Veſtri Ordinis ornamenta conſlata ſunt? Vnde intextæ Auro
Mitæ? Tæniæque Pontificum collo ac pectori implicantur? In Vos Illuſtriſſi-
mi, ac Reuerendiſſimi PRÆSVLES humanis maiora longe Decora, ex Hu-
ius Dedecore Doloreq; manarunt! Neque enim tam humanarum Vir-
tutum ſucco, quam Huius colore ſanguinis tincta Summo-
rum veſtimenta Antitiſtium purpuraſcunt! Potuine igitur a-
liquid, vel ad Votum cumulatiuſ, vel ad Honeſtandum Honorem Tuum ambitioſ-
ſius euenire, Tantiæ Maieſtatis allapſu? Nimirum Ille Te, ſui vtiq; Pupillam
Oculi

Oculi non lustraret? Tuo se non inferret Delubro? non Oris vultusq; natium Splendorem intenderet? Lucem Aris, venustatem Altaribus non afflaret? idem Ara, idem Victima, qui Sacerdos? vel intra Astetica Religiose Contemplationis Umbracula, Diuinitatis radium porrecturus; quo deinde Sacer Sylvarum Incola, ex Umbratili recessu in Solem, è Solitudine in publicum & frequentiam prodeas, aucturus non uno Gaudio Latum Diem. Ut iam HONORARI Templi Faciem, Coronis ex more Aureis perornari nolim; Nolim sueta parietibus affigi luminaria, in tanto vel Domestici, vel Accessorij Luminis & Pompe apparatu. Quæ Te itaq; Meritorum Felix Neccitas Altioribus dicandum Aris admouit, hæc eadem & Religiosis Mentibus diem dixit: Ut, si non Satellitium Honori Tuo aliunde Honoratissimo, saltem Umbram factura adsisterent. Nam & Illustres absq; Umbris Imagines non fuere. Leti adsumus ad Tua Sacra, modico Thure, (quæ Nostræ portio Fortunæ est) sed purâ mente Litantes, Libantesq; de Oleo Auspicatissima U N C T I O N I S, in Nostræ quoq; Oram Pallij, deriuando. Adsumus inquam, non hodie primum Initiati Obseruantie in Te Nostræ Cultores. Habes Deuinctos Votis & Affectibus; quos, pro Ea, quâ polles Ligandi Potestate Obligasti, Ritu & Nexu æternum duraturo. Primas, Primoribus hoc Officij in Munere partes cedimus. Languent Umbratiles Priuatorum Voces, ubi Domi Natæ Illustræque Infulis Dignitates, Tuæ Lucem Inaugurationis Amplificant, ab ea quam eximie sustinent Personâ. Ver & Æstatem (Spei illud, hoc Rei emblemata) transmisimus, non Votis tantum Animisq; verum & Floribus atq; Aristis referti obuiam Honori Tuo ferebamur; Cum ecce Tu lepidam vel Apollini Nostræ ignorantiam obijciens, Voces & omnia Gratulantium ad Maturitatis vindemiam, Nouembres distulisti ad Focos, Focis Patriæ Arisq; moram prorogati Temporis extorquentibus. Atq; utinam ad Votorum Summam Tibi contingeret, Vnum instar Omnium habuisse PATREM PATRIÆ, Tui Initia Pontificij Conseruantem! Quantum Diei Hodierno ex illa Serenitate Maiestatis accessisset, vel ad Plausum, vel ad Pompam! Interim Absenti non omnino Absens, Regijs interest Auspicijs; ut quem nuper in Hostici Confinijs, agrè à Suo Latere (velut Magni Consilij Angelum) humescentibus oculis dimisisset, Eidem Regalis Benevolentia Numine, (vel in distans) adspiraret. Scriptionis Argumentum, extra Te Romanasq; Carimonias ne quaererem, iisdem me scribendi Legibus, quibus Tu Te Initiandi Ritibus, circumscripsi: Auctoris Pudore cum Obsequendi studio, certante; ne auderem Laudare, quem Laudare non possem. Sed prepotuit Tua Humanitas, ut iusti silentij perfractis legibus, inter Secunda Apprecantium, cum Præstite Eloquentia Tullio, alteri nempe Curia Tullio, vocem darem. PANECYRICÆ GRATVLATIONI Laudes à Se Laudatissimi Principis intexui, quod Te id probaturum coniectarer, Separarem videlicet interstitio Paginæ? nec locorum spatijs, nec Regionum distantia, à Tua Fidelitate Disiunctum? Assume (quod reliquum est) Initiandam Tuâ Prosperitate Operam Auctoris, quem ex diuturno Præcelsæ Indolis Tue (Karnkouiani Sapientiam Athenæi appello) Admiratore, Subitu Gratulatorem simul Instituis simul ignoscis, Memor apprime:

Nullum sine Veniâ placuisse Ingenium. Seneca.



PROLVSION

AD INAUGVRATIONEM.

I.

Tandem

SVbmitte aliquando **Honori** Infulato
Jam pridem Consecratum Reipublicæ Curis Caput,
Ex Hominibus, bono Hominum
Assumppte Pontifex.

Ad Heb.
5.

Ipsa Te Sacrorum Antistita Religio
In Altioris adyta Sacrarij manu ducit.
Nemo Sacrâ aut Ciuili Dignitate dignior
Quàm, cui Dignitates, ex dignitate gerere solene sit.
Nisi quòd Tu, Nobilis Gloriæ fugitiuus
Trahi Te potius ad tua Decora quàm duci patiâre,
Totus alienæ Transactor felicitatis, parcus Tuæ.
Adeò instituendis Regni Ordinū Fortunis occupato
Priuatæ incumbere Sorti non vacabat;

Benè utique persuaso :

Spretam in lemente gloriam, redire vberius in culmo.
Par prodigio Moderationis exemplum
In ipsa Potestate, modum potestati scripsisse!
Multum ab humana deflexit cōsuetudine
Quisquis Ambitiosæ appetētiae parsimoniā indixit!
Diuinitatis ingeniū est: Suâ se inuoluere magnitudine.

Hinc

Et maximis religionibus lucos prætexuit antiquitas
Maiorem videlicet ex abdito Venerationē habituris.

Citò desitura Ambitionis argumentum creditur:
Toto simul in publicum prodire apparatu.
Planetarū quoq; principi, inde maiorē videri cōtigit
Vnde minorem se, obiectu Nubiū, commentus est.

Eò Tu insuper admirabilior,
Quòd longissimā etiam iniquitate temporum,
Ad Tuæ præscriptionem Modestiae rectè vsus
Omni Excellentiae gradu celsius potiusq; duceres:
Priùs Patriam statûs pristini reponere in gradum
Quàm ad statum staturamq; altioris assurgere
Sacerdotij.

Importunum Ratus.

Læta dedicandi Nominis obire Encænia,
Bellorum tempestate Aras & focos inundante.

Sic

Præfinita Inaugurandis, iure Maiorum, interstitia,
Fatorum iniuriā, & Tuo seruanda Pontificio fuere,
Sub armato irati Martis interdicto
Festum Honorariæ Celebritati diem dicere, nefastum
erat.

At, vel nunc demum

Magnorum in Superos Hominesq; meritorum reus
Maiores prehēde Aras, grādiōribus Hostijs placādas.
Habes apparatissimæ Inaugurationi præstò omnia:
Incomitatus prodire in publicum haud poteris;

* Acoly-
tus Græcò
Immobili-
lis.

* Acolytarum Te circumstat Ordo Virtutum:

**Omnes lectæ censæq; sunt
Cœlo indice, Româ Iudice.**

De pretio earundem, vt ne dubites,
Ad Lydium Orbis & Urbis exploratas noris;
De sæculorum iudicio ynde quaq; securas
Ex quo Dei & Regis calculo approbatas.

SERENISSIMVM JOANNEM CASIMIRVM

*difficillimā Expeditione secutus, fido præsenteque Obsequio, in—
Castra Comitatur.*

Audentiorem Audace Boleslao CASIMIRVM

Plus ultra, Plus & Citra Progressum—

Fido secutus Comitatu, in Toga & in Sago PRÆSVL

Gestationi armorum, suffecit tractationem animorum;

Idem, & Sacræ Stipator Maiestatis, & suæ Fidei

Stipulator.

Quò Locì

Amphiaraos & Tyresias, sequacia Castrorum Numina—

Fide, Consilio, Oraculo inumbravit Suo.

Scilicet,

Oppositu Tripodum, in quadrupedum Vaferrimos ?

Fibris pecudum, in hominum pecudes pugnaretur ?

Nō Auiū oscitatione, sed Aquilis in vultures illos itum.

Quod si

Legitimè duntaxat Certantibus palma præcerpitur,

Nemo Te, palmæ propior, nemo iuris melior ad Coronā.

Superata flumina, euicti torrentes,

Absorptæ molestiæ, deuorata pericula, exhausti metus,

Robustum Heroicæ indoli in alimentum cessere.

Merito igitur

Trans-Borystheniæ theatra Tolerantiæ

Aspectabilem CiuiCi Plausûs cōmutantur in scenam ?

Tolerata sub papilionibus Hyemes

In Vernæ Magnificentiæ tentoria explicantur;

Incultæ solitudinis horror, honore frequentiæ pensatur.

Molestum Hoc Ignavis Calcar, aut Supplicium

Tibi vtriusque sortis experimentum fuit.

Quanquam Fortunæ hîc quorsum memini ?

Ex Destinato Vinere & Agere assuetus

Vt Fortunæ, Tui copiam non facis,

Ita Casum non aduocas in Consilia.

*Antiquæ
superstitionis mos.*

*2 Timoth
2:*

A 2

Istud planè est

Peregrè in suam laborasse purpuram.

Domus Vos igitur continete

Tyrij & Sidonij, colorum fucorumque propolæ,
Vestro non eget Murice, Virtus de suo paludata.

Peregrinum vix sanguinem & succum non emit,
Qui inuectitiæ tincturæ, natiuum anteponit splendorem.
Quam decorum Tibi & dulce: Antistitum Toleratissime,
Per aspera & confragosa viarum.

(Hoc est Fortium itineribus)

Ad Tui Capitolij fastigium euasisse!

Tantis malorum impendijs, tanta bonorum compendia parantur,

Hebr. 2.

Tentatus per omnia calamitatum discrimina Dolorum Pontifex

Eidem Te excolendum Tirocinio addixit.

¶ T A

Bellorum euentis utcumque impedita Expeditio
Expeditum Tibi ad solennia Inaugurationis, fecit iter.

Hiberna isthuc Spartanæ Patientiæ,

Hic stationis pacatæ Æstiuæ metaris, vel in Vere.

Jactatus in alto Ciuium Curarum,

Emerita Quietis duc in altum.

• Hodier-
nus Pon-
tifex.

• CVSTOS MONTIVM

Custodem Te Mentium pronuntians

Prætoriam SIMONIS in Cymbam Te accipit.

Tutiùs nauigat VATICANA Felicitas

Vbi plures remigio Argonautas adsciuit.

III.

Serenissimi Regis Nomine, Exercitibus agit gratias.

Et iam

Incerta Auspicum nihil moramur auguria,

Dum victorioso NICOLA I ex Nomine omen
capimus.

Tui primum, dein Militum Triumphator

Laurum

Laurum explica, quam prænominis éthymo polliceris.

Pulchrum est ad domesticæ decus Victoriæ
Tripudiandi causas intra Nomen habuisse.

Quota hæc ad Posteris commendatio?

Inaccessa præliarum mentium propugnacula

Admotis dicendi machinis expugnasse!

Interq; manubias & spolia Animorum
Captivas amore Acies in Triumpho duxisse!

Ad cuius Miraculi stuporem revocaveris?

Fecialis Eloquentiæ inermi telo
In præcordia Militis, altiùs descendisse!

Non indecoras Marti lacrymas
Nisi novus in purpura Tullius, non exciret.

Actæ Regis Nomine Exercitibus Gratiæ
Humanâ maiorem fandi gratiam exegere.

Cui silentium attentionis non impetrauerat sed impe-

rauerat

Maiestas Principis circumlata per turmas.

Porro, superflua illic Demosthenis vehementia

Vbi Lenitas Regia, in suo perorâset Interprete:

Vocis & laterum contentione opus non fuit.

Solâ Actionis venustate, suas transigente partes.

Et verò

Non surdis ad vota Patriæ auribus,
Præsens Necessitatis Oratio Ratioq; persuasit;

Quod nec Attici vis Eloquij peruicisset;

Præsertim

Quòd verborum elegantiam Campestris non admit-

tat orchestra.

Vix audiuntur Oratorum fulmina

Inter fulminantium tonitrua Machinarum.

In primo Oratoriæ impressionis assultu
Signa & galeas, Regnatrici Aquilæ submisere Cohortès;

Moturæ eò acrioribus in Hostem animis

Quò generosiùs, Tux classico Facūdix excitis arrectisq;

Rumore per stationes & Tentoria vulgato:

A 3

Nun-

Nunquam sic aliàs, *Mentem & Os Domini Locutum*!
Isaia Inuideat Romanis disertum Cyneam Pyrrhus arrogās,
25. SVO beata NESTORE Polonia,
Nec inuidet suos Exteris Oratores, nec ambit.

Nempè

Et Nostro huic, Togā inter & Sagum posito,

Domi militiæque

In expedito Consilia, in procinctu Suada.

Nec mirum

Comitia ac Senatum intra se circumferenti

Nusquam res, & Verba non suppetere;

Vel ad subitam extemporalis copiæ affluentiam!

Quà militariter succincto Breuitatis Cultu,

Quà civiliter explicatâ Sermonis pompâ.

Recantet iam Palinodiam quisquis cecinit:

ORATORIAS inter Arma SILERE LEGES.

I V.

CIRCVMSTANTIÆ CONSE- CRATIONIS.

Non frustra

Sacer Antistitum Triumuiratus

Tuo Muneri Oneriq; adsistit assidetue;

Nimirum

Pontificij moles Negotij; tribus appensa Digitis

Tuis libranda Manibus, gestanda humeris deponitur.

SACRAM Candidatæ Felicitatis Stolan,

Tripartito pollice, non profanus contexit labor.

Et Hic DEI Triplex DIGITVS

Hebr. 9. Futurorum Te Præstitem Bonorum indigitat!

Trium in Ore Testium, testatior constabit Virtus.

Nemo non istorum

Tuis

*Tuis velificatur desiderijs ,
Tuis adspirat Auspicijs ,
Tuis adstipulatur Promeritis ,*

Nempè

Ethi Tres , animâ spirantes in vna
Vitæ Tibi & Famæ , triplex inspirant spiraculum ! *Genes. 22*
Felicem Te supra vota Elysei , ô PRÆSVL :
Duplicem ille Magistri Spiritum attraxerat ; *4. Regū. 2.*
Tu triplicem è sacro Flaminum Ternione !
Et adhuc , collecto in Te COLLEGARVM Spiritu afflatus
Pestifera dissidentis Aëoliæ , non difflabis flabra ?

Sortem diuinioris Ministerij Sortitus

Non & tantorum Consortes operum sortirere ? *Astor. 1.*
TERNÔ STIPATVS ACHATE
Stringe acutum utrâq; parte Gladiū in Lemani Hydras.
Ad secunda monstrorum sæcula deuentum est.

Nec sine Numine Diuūm ,
Gentilitia inter Arma , præmunitū Soleis *Mucronem* geris .
Per opportunum perimendæ Hæresi instrumentum.

Experire si lubet

Num a PETRI *Acinace* contactus , vim & acumen
acceperit .

Vt absit incurfantis Malchi violentia ,
Non deerunt Gigantes , Coelo secundam oppu-
gnantes Romam .

Tu interim

Præcipientis Domini obsecutus imperio

Mitte Gladium (Pacis & otij) in vaginam .

Sat , superq; tot aduersis limatus . *Ioan. 18.*

Longo Militiæ splendescit ab Usu .

Vide , vt in singulis vitæ actibus singularis
Ad Vittarum quoq; eximiam possessionem

Singulare meriti ius à se ipso exegit .

Ac , ne ex improviso subitus veniret ad Tiaram ,

Inter Coeli & Soli ardores algoresq; versatus .

Vltrò institit durare , & durari ad Mitram . *V.*

Solenne Iuramentum præstat Sedi Apostolica.

Ritè Sapienterque

*Caput se-
nus.*

Initiandi sui primordia à Capite exorsus
• C E P H Æ Orthodoxorum primo Principi
Os & Suadam consecrat PRÆSVL Noster!
Primæ Veritatis Magistro & Interpreti
Mentem & linguam principiò dicari par erat.
Non aliàs vnquam religiosius:

Ex pretio Maiestatis Vaticanæ Locutus est Homo!

Habet iam Romanus A L E X A N D E R
Togatum Triariæ Cohortis Primipilum,
Maioris auctoramenti succinctum baltheo
Initiatum Sacramento.

Benè habet

Ad Tim.

Contestatæ ad Aras Fidei, iuratus Assertor
Bonam (comite Timotheo) certaturus Militiam,
Martialis prosapiæ suæ, Ensẽ & brachium
CHRISTO & PETRO deuouet, vtroq; pollens.
Securior Lateranæ Eminentia Basilicæ sese efferet.

Tam Sublimis accessione Munimenti.

Diuini æquè ac Humani seruantissimus Æqui
Potestatis Latix iura, Honorem, prærogatiuas
Vindicare, tueri, prolatare ex vsu habet:

Romæ & Patriæ medius
Sacro-Ciuilis Curix priuilegia, & Causas,
Tam sui Capulo GLADI,
Quàm ANNULO PISCATORIS consignat,
Idem legum Arbiter, idem Custos.

Cæterum

Vetita hæc vobis Templi limina ne attingite:
Quibus iurandi æquè ac peierandi par leuitas
E peruersioris Politicæ Magisterio inhæsit.
Perditæ mentis, improbi Circulatores

Fidem

Fidem, tunc maximè obligant, cùm maximè violant :

Strada.

Pulsant Tartara, dum Sidera testantur,
Superos, medios, inferosq; miscent

Periuri Votorum Impostores.

Crepate vos deinde

Liuenti inuidiâ tumentes Rabulæ,
Ad præconia Romani Magistratûs
Muti stolidè, obstinatè elingues,
Claues PETRO & Clauum, (si liceat) erepturi.

Vsque adeò

IN PETRÆ Offendicula impingere & illidi, Vestrum est.

Atqui non placet Orci Satrapis
Solenne ELECTI Præsulis Iusiurandum?

Non tam è vetere Moris Formulâ

Quàm ex arcanis Animi Tabulis Nuncupatum.

Fuerit inuidis Affectatoribus
Tuæ Prosperitatis Initiametum tormento,
At Veri cultoribus, documento futurum:
SEDI APOSTOLICÆ obsequentem Reuerentiam,
Velex Longinquo intendi posse.

Ac ne multa

Sume Ter Sacrum * Codicem
Cuius in Verba, tacto Religionis pectore
IURATVM EST.

**Euange
liorum
librum.*

Euolutâ Humanæ Eruditionis fliade

Euangelicos euolue Fastos,
Quot apices, tot Oracula complexos!
Tota hîc Diuinitatis Oeconomica,
Tota Recti Honestiq; Ethica,
Tota vtriûsq; Sapientiæ recondita Supellex
Vnum VERBI in Compendium Collecta est!
Superaddat, (ex utroq; Caesar)
Suis pugionem Commentariis.
Vel ad terrorem Auctoritatis vel ad fastum,

Tu Tuum, DEI Annalibus adde GLADIUM,
Pronuntiatae modò Fidei,
Vel Tutamen vel Pignus.

V I.

SACRO INVNGITVR CHRI-
SMATE.

Descendite, Luctatoriam Fortes animæ in arenam,
Lacertosus Polonæ Curia Atlas, vngitur in Athletā.
Nobilis Agonotheta, nouo Gloriæ initiatur Agoni.

Efformato in Crucem Oleo intingitur,

Ne fluxum ad delicias, aut molle suspiceris Unguentum.

Pigmentariam, vt lubet, adite Officinam,

Luxu & otio enerues elumbesq; Sibaritæ.

Gymnici isthæc Exercitij Palæstra est,

Volatica fucorum examina procul arcet.

Ex alieno natis vinere; fatale Muscis Oleum est.

Sed & Vos,

Procul este profani, Sacrorum derisores;

Bonus Christi Optimi Odor, malè Olentibus, malè olet.

Fremat indignabundus, nimium emunctæ naris

Jscariothes,

Franginollet alabastrum Vnguenti

In vsum Verticis Nazarei.

Tota illi Auaritiæ ratio:

Matth:
26.

Potuisse Venundari & Venire Multo.

Malè quæstiosa cupiditas, perditum iri putat.

Quidquid vngendo Diuinitatis Capiti impenditur.

Perge NEO-PRÆSVLIS INCLYTE CONSECRATOR,

In perungendo tam utili, PATRIÆ CAPITE,

Oleum & Operam, Non perdes.

Non parco pollice

Liberalem NICOLAI Verticem, Manuq; inunge,
Ita,

Ita ambit, ita flagitat,
De hoc ipso LV CENS O LEO* LVCEORIA,

Quò, è Capite sui Præfulis

In Suæ fimbriam Chlamydis guttatim defluat,
In Oram quoque Wothyniæ vbertim descensurum.

Procul & de medijs Palestinæ finibus pretium illi!

Ab vsq; Gethsemani Oliueto deriuatum noueris!

E Dominici Sudoris Cruorisq; Opobalsamo

Istud eliquatur Vnguentum.

Illo Hortensium è torculari Olearum,

** Sacratior Vnctio Sacerdotum, hodieq; emanat.*

** S. Leo.*

Ille ipse Cœlorum Terrarumque Gigas

Supremâ cum Doloribus in agonia colluctatus,
Athletico Te, contra Antagonistas præparauit Agoni.

Hem! quàm oculata Numinis præuidentia!

Suo semel tinctus oleo Pœnarum Rex

Regali Sacerdotio vt indidem superesset, fecit.

Pleni Rore & Cistis Noctium Cincinni eius,

Cantic: 5

In Tuam etiam redundauère Cæsariem!

At enim: Vaticana exsecranti Sacra

Delibutus Chrismate, Schismati ingratum oles;

Latino dari sibi de Oleo haud merentur.

Qui Othomanicâ venale in Porta Oleum exportant,

Egregiâ optione: Lucrati pro Olea Oleastrum.

Romano-Catholica indiuisi Spiritûs Vnctio
Scissum Romano à Capite non impingat Caput;
Neq; medetur, Animorû ex dissidio, hianti plagæ.

Videte mihi

Ex Contumaci Superstitiosam Aulusorum Sectam:

Auersa ab Occasu in Ortum, Saracenicam adorât Lunam

*ob Patri-
archam
Constan-
tinopolit.*

Suæ Lenitatis Inconstantia Concolorem,

Nihilo lyncea, si in ipso cæcutit Oriente.

Plaude iterum, toto Climatis vertice, LVCEORIA.

En ipso Capitalis Corona in Vertice

Pacatæ omen Oleæ prætendit, dum portendit

Tibi Vnctus Augur,

Cōprecantibus PACEM Sibi Collegis,
Redditurus Voto & Re, in vindemia maturæ Pacis.

Quod si natura Olei

Plin. l. 2.

c. 103.

* Adagi-

1172

Mare, Rem Omnium sauisſimam tranquillat,

Suo* Tranquillior Oleo Antistēs,

Decumanos bellorum fluctus

In Malaciam non componat. ?

Agite porrò, Acalolytæ functionis Ministri:

Cogitatura Cogitationes Pacis, Capiti

Impressa Pacis liquidæ Symbola ne extergite.

Quin & Tu ipse (si me audias)

Sacro imbutas liquamine palmas manuum

* Pontifi-

calis ritus

* Demissâ hâc è Collo Fasciâ ne ligaueris;

In Tractationem Paciscendi Fœderis, actutum Soluendas,

Aut Victricem (me Vate) explicandas in Palmam.

Benè nihilominus

ex Ritu

& more.

Pressis manibus, illitum tenes fouesque Oleum:

Non ex vano diuinante Patriâ:

Pactorum Conuenta Euentaque

Tibi in Manu aut sub Manu fore:

Plin lib.

15. C. 3

Et iam antiqui legem Adagij non audio:

STRINGI OLEUM, prohibentis.

Quid, quòd Regum Parens & Nutrix Varſauia,

Formari Te in Hominem Homine Maiorem, gausa

Secundos hîc tibi Natales,

Et altera gratulatur Genethliaca !

* Ex usu

ritu.

Sic inter Lintea, & Vincula Vnctionum*

Ampliores Ligandi Soluendique renasceris ad Fasces !

Tanti est:

Inter Fascias nasci DEVM, & Creari Pontificem !

V I I

PASTORALIS OFFICII BACVLVM

DE MANV INITIANTIS ACCIPIT.

Am-

Ambitiosum olim Pastoris Nomen,
Nisi à Supremis geri Magistratibus fas non erat.
Pastoritus Baculus, Regalis Sceptri Anteambulo. *Iosephus Histor.*

Cyro, Pastorum inter greges Egregio
Notiora prius Caulæ quàm Aulæ itinera.

Inter Quium armenta Mosis
Perarduæ Legationis obuenire momenta.
Pastoralem prius, Pacatus Dauides
Quàm Imperatoriam armatus Clauam pressit.

Ludentis ea Fortuna Variatio isthic fuerit,
Hic Æternæ Mentis & Dexteræ Comutatio. *Psal. 76*

Itanè verò

Inserta ioculariter, D E I Manibus Arundo,
Serium Potestatis Pontificiæ succreuit in Sceptrum?
Fragile Ventorum ludibrium Calamus
Jisdem Patientis D E I duratus malis
In robustum Coerctionis Scipionem euasit.
Timete Audaces Rapacesque Lupi

Ex miti Acrem

Alterum Aaronicæ Portitorem Virgæ.
Mitissimus, vel D E I præconio Pastorum ille
Purpurato quondam Quium *Oppressori
Formidabile, cœlo terræque, obiecit Telum.

Num: 12

** Pha-
raoni.*

Spectate eminens

Lenissimi Pastoris illustrem portentis *Caduceum
Vt sibilat in Serpentem!
Vt rubescit in Cruorem!
Tenebrescit in Cinerem!
Grassatur in funera!

*Exodi 7.
8. 9. 10.
Ec.*

Tonat, grandinat, pluit, fulgurat, fulminatque.

Terroris illa

Hæc Fiduciæ argumenta accipe:
Sæuiantis apud Ægyptios,
Domi Mansuescentis Virgæ.
Quum, translatis à Pauore Palloreque ostentis

Blan-

Blandiora Humano generi germinaret in prodigia,
Extuberaret in gemmas,
Explicaretur in folia,
Maturefceret in fructum.

Rata fixaque in rem NEO-PASTORIS Eruditio :
Amoris indulgentiam, supercilio Terroris cōtrahen-
dam esse.

Dictum Bonæ Pronæq; Indoli
Effato sese euolvente in Factum;

Vnde enim

Modò VNCTVS, modò Cinctus
In Pontificem NICOLAVS

* ANi-
colao Ma-
chiauello
& Leon-
tio eius
discipulo
exortos,

Et iam sui temporis * Nicolaitas & Leontinos
(Malis Artibus, malo Orbis institutos)

Primo omnium fulminauit Anathemate !

Pestilens Sectæ genus

A Sui Communione Consortij procul habet;

Nec alloquio nec Mensâ dignatus

Quibus cum malè conueniat Virtuti.

In blandè Subdolos, ex aperto Seuerus.

Boni Pastoris esse :

Tondere Pecus, non deglubere

A malo cætera * Principe dictum benè.

* Galbâ
Imperat.
Roman.

Sed Imperatoriæ hoc vocis tonitruum,

Conductitii Custodis Mercenarias ferit operas,
Nostrum nec afficit, nec percellit PASTOREM

Prima Hæc Illi Gloria : Præesse & Prodesse Gregi.

Gnarus perbellè

Quid inter Aulæ & Caulæ Negotia intersit.,

Ita suis Munia numeris distinguit & contemperat,

Vt & Regi Suo adsit in Opere,

Et Gregi in prouidis Curionibus non desit.

Securæ abhinc Vestri velleris este Oues:

Vestri Tutor & Pastor Ouilis, à se Ornatissimus,

Vestra

Vestra vobis tegmina in tuto integroque finit.

Ex Ritu Initiatus Aaronico,

Gedeonici Lanam Velleris

In Sui Stamina[†] Laticlauij deducit.

[†]Senato-
ria Vestis

Gestent Aurei Velleris Decus Colchicum,
Torquati Ordinis Ritu Initiati Principes ;

Tibi : * Palabunda Ovis Alteri Baiulo, Cura potior:

Lucæ 15
Errans

Amissa quærere, quàm potiri inventis,

Ovis.

Et Latia, Errantes reuocare ad Septa Capellas.

Ioan: 10

Vnum O-

nile.

V I I I.

MITRA PONTIFICALIS, CONSE-
CRATO IMPONITVR.

Recurrite

(Si quis Orco regressus) Histrionicam in Scenam,
Otioso sæuientes in ludo, Ludiones.

Cernite & Stupete:

Vt plexum acutis è Sentibus Infanti tormentum,
Coronato PRÆSVLI cedat in Capitis Ornamentum.!

Cruciamenis miseri semel apud Homines, DEI,

Tuæ Inaugurationis Coronamenta stetere.

His tinctæ insperæque guttis,

His distinctæ pyropis Tæniæ,

Ipsi ad inuidiam offulsere Soli!

Vinctus Dolorum Imperator

Asperatâ dumis horrentibus in Galeâ

Tuo Militauit, vel Exauكتورatus, Honori.

¶ Illa Regnandi Ambitiosa olim Planta

Indicium

A pedestribus insidijs Diuinum eluctata in Verticem

19.

Quâ Regibus in Coronas,

Quâ Pontificibus in Mitras germinauit.

En

En

Vt illusi Numinis textum vepribus Diadema

S. Da-
mas. lib.
4. ad Eide

(Romani potissimum gratia Principatus)

Auro gemisque radiantes retextum est in Vittas!

Roma purpuræ Domina His opus habebat;

Ioan. 18.

Et Milites quidem Hoc Fecere Sertum;

Qui suo melius Capiti Ciuicam texuissent;

Hoc vno, ô Pontifices, de vobis meriti,

Quod, nec cogitantes in Vestram laborassent Tiaram!

Acutum & subtile malum Ambitio

Interdictum dehinc sibi nouerit isthoc Capite.

Satis fuerit, *Superbissimo Plantarum Erutici*

Semel regnasse in Vertice NAZAREI.

Deuter.
36.

Cornutam instar Mosis faciem vt non gerat,

Gerit Cornua in Apice Infulato,

Inflatum turgentis Arrogantiæ expuncturus Fastum.

Heus & Tu

Gemmarum quàm DE I peritior Ora Piscaria,

Expiscandis Vnionibus, ne nimium insuda:

Compactum Stellis, Compunctum Spinis Caput.

(Sanguinolento colliquescens tabo)

Sponso in Infulam, Sponsæ in Cydarim

Erythreis cariores, exstillauit gemmas.

Nolim te & Byssino sollicitam de Vestimento:

Byssum illi Candidam Suus concinnat Color,

Hoc est: Patritius Gentis Candor

Antiquæ Probitatis à Sanguine, inditus illitusq;

I X.

ANNVLVM PONTIFICALIS OFFICII

DE MANV CONSECRANTIS ACCIPIT.

Restat, vnicè Coronanda Auro Manus

Quam Sacro-Athleticus iam perunxit Liquor.

Expor-

Exporrige Digitum capiendæ Æternitati,
Cui vel ipso Annuli circulo prælusisti.
Ferat Vocale in digitis Horologium
Quintus numero, primus Gloriâ Cæsar Carolus!
Agendi Spatia temporibus distinguat;
Multò facilius: *Tempori facturuspretium*
Quàm Rotas Fortuna, suo inflexurus arbitrio.

Vt vt cesserit

Operosæ Artis admirabile Opificium,
In Tui Comparisonem ANNULI non Veniet.
Toto Orbis ambitu Æternitatem præferentis.

Cui & Tu

*MVLTOS Victurus AD ANNOS
Hoc perennitatis Pronubo, Hoc Sponsore
HAS SVB-ARRHATVS AD ARAS
Destinatis Deuouerisque

*Formula
Pontifica
lis.

Et Superis & VOCE TVBÆ Clangentibus Astris.
QVO Te Felicitatis Calculo insigniueris
Fortunatissime Inauguratorum NEO-PONTIFEX?
Ad Cuius Triumphalia Sponsionis
Princeps Triumphantis Bellantisq; Sponsæ Arbiter
Dedicatâ Basilicâ adesse voluit & præesse.

• Ps 46.

Consecra
tur Die
Dedicat.
Basilicæ
Saluator.

Ratæ Fidei Signaculum

Redditurus Ipse Fixius, è CLAVORVM FIXVRA.
Polycrateo, Tuum non Consigno Diem Annulo
Veleò, quòd nimiâ temperatus Fortunæ manu
Etsi nollet: non posset non esse Felix!

Ioan: 20.

Idem ipse

Fauentis Dæ Mancipium Polycrates,
Experturus: An inter Exempla Infelicitum esse posset
Jacto in Mare Annulo, Heræ constantiam explorauit;

Sed

Auarum alioqui Elementum, *gemmam reddidit
Quam infelix Felicitas fabricâset.

* In pisce
capto.

c Placet

Placet Pyrrhi Annulus vel ex eo:
Quòd , *Doctarum Frontium* cœlaturâ insignis
Chorum cum Apolline , (*Musica Canoraque Numina*)

Pausan.

Miro Naturæ artificio adumbrârit.

Sculpendis cœlandisque Tuis Dotibus

* *Apoc:*
17.

Nulla (*Si Cœli* * *Margaritas excipis*) Gemma sat est !

Vniuersale quoddam Bonum est, Tuus HONOR,

Æquâ sui partitione : Summos complexus Timor

* *Apollinis.*

Sceptrum & Plectrum * Delphicum non excludit.

Tanta ei, Admissionum è Vestigio Facilitas !

Magnis Mentibus & DEO-Homini, confine est :

CRESCERE PER DESCENSVM.

Jactet Scriba Claudij Imperatoris :

Unâ à se Bonos Principes Conscribendos gemmâ ;

Prò !

Aut infecunda Virtutum sæcula

Aut fecundam nimis , *non se tenentis Lingua* , Venam.

Scilicet Tuæ Te caperet LVCEORIÆ , gemma ?

Quem nec Suo , Polonia circumscripsit Orbe ,

Extra Patriam , non extra Te consistenti

Roma Publicæ Lucis Hospitium,

*Ad Rerum
kociam.*

Transsylvania , Legato Principis , par Gloriæ thea-
trum dedit !

Fluctuantem in Turbido Reip. Nauem

Iniectâ Consilij Manu subducturo in Siccum,

Si A I A C E M , præceps animi audisset V L Y S S E S !

X.

ALLVSIO AD DOMESTICA PRA-
ZMOVIANÆ FAMILIÆ
I N S I G N I A .

Etiamne

Musis ad Gratiam : Phœbo ad Gloriam

In

In Infula Bicorni
Bicipitem fert Parnassum?

7TA EST

Amat Literatos, Omni Literatura genere instructissimus!

Efferit supra Caput Literas,
Quarum Officio, & Beneficio
Ultra Sidera efferendus, Curia illatus est.
Habet Memoria Fastos & Carmen,
Quisquis Fastis & Carmine digna gerit.

*Claudia-
nus.*

Ast, & Pegasus

Aliquid Sui Tuo recognoscit in Stemmata:

Cedit Marti *GLADIVM
Sibi *SOLEAS iure suo vsurpat:
Non temerè iam SONIPES dicendus,
Ex quo: Sonora ad Posteritatem,
Solida ad Famam

**Insignia
Consecra-
ti.*

Duratura ad Perpetuitatem
PRAZMOVIÆ DOMVS DECORA
GLADIVM ET SOLEAS
Solo & Cœlo fixerit.

Adiecto Lemmate:

*Stringere Romanâ pro Libertate MVCRONEM,
Et †SOLEIS Triplicare Suae Vestigia Landis,*

*†Tres So-
leæ Gen-
tilitæ.*

Eximium est, Polonum est
PRAZMOVIANVM EST.

XI.

PANES ET VINVM CONSECRA-
TORI AB ELECTO VNCTOQ;, RITE OB-
LATA, SUPERADDITIS VTRIVSQUE
ANTISTITVM INSIGNIBVS.

Sæcula & Personas interire, euenta causasque recurrere,
Sacris alibi vtriusq; instrumenti Tabulis,

Sirada.

C 2 Hic

Hic Romani ritus instruimur praescripto:
* *Pape* Ex vetere Instituto Romani * MELCHIADIS

† *Genes:* MELCHISEDECI Regalia Donatiua

14 PONTIFICVM CONSECRATORIBVS

Honorarium esse caeperunt!

Honoratissima Auspicata Solennitatis Appendix.

Statuti in Causas inquirere, cui libet, licet.:

Sterile aut infirmum Inaugurationis decus ne esset.,

PANE ET VINO

Marc:
11.

E MENSA DIVITIS huc illato, stabilitur.

Quorum alterum Corroborando

Pf. 103.

Alterum Hilarando Homini subigitur.

Nihil eo utilius ad usum, nil opportunius ad My-
sterium.:

Humanae Societatis Vinculum.

Hoc Adminiculo coalescit.

EX UTILI ET DECORO

Constare Celebritatem Tui Actus in confesso est,

Oraculum ausculta.

Zach: 9.

Quid Bonum eius est? & quid Pulchrum eius?

NISI FRUMENTVM ELECTORVM,

ET VINVM GERMINANS VIRGINE S.

Tota Boni & Pulchri Ratio hic exsorpta.!

An quidquam Augustius Lautiusue

Suo promeret INAUGVRATORI ELECTVS

ELECTORVM FRUMENTO?

Aut propinaret generosius

VINO in Pudicitiam GERMINANTE?

Hoc in Epulum, Hoc in Poculum

Diuina Humanaq; Cupediarum Opsonia coacta sunt!

Idem Conuiuia, idem Cibus, HOMO-DEVS

(*In suprema quondam Accubatione Cœnaculi*)

Extra PANEM ET VINVM

Quod Epulantibus apponeret, DE odignum.,

non inuenit!

Consumptū hīc, exhaustūq; Diuinitatis Prōptuariū!

Næ ille mihi ad Propositum dixerit:

Qui Duos, è Propositis modò Panibus,

PANES PROPOSITIONIS legitimè nuncupârit *Leu. 21.*

Flagrantibus adhuc Sacris recentes calentesq; ;

Nisi fortè ex Domini Fragmentis agmentatos credas?

T A M E T S I

Quòd ET PANES FACIERVM,

Appositè (*ad Expositos in præsentiârum*) dici posse

E *Purpurati Dalmatæ Scito liquet.

**S. Hier.*

Veleo (nisi fallor) nomine:

Quòd bino PONTIFICVM STEMMATE inaurentur.

Nobilitatum Insignia: *Maiorum esse Facies*

Neoter.

Tam verè quàm argutè pronuntiatum.

Non magis Ora Vultusq;, Homines ab inuicem
Quàm Ceræ & Stemata Genus Virtutēq; distinguūt.

CERNE & æstima CONSULTISSIME SACRATOR

Eâdem à Te INAUGVRATIONIS Operâ

Simul NEO-PONTIFICEM, simul Basilicæ Ædes istas

In OPIS & PACIS Titulum dedicasse!

Non tam ex Oblatæ CERERIS & *LIBERI libamēto **pro vino*

Quàm collatis cum CONSECRATO Insignibus *sumitur.*

Animisq;ue.

In tantum: Bonæ Magnorum Mentes

Ipsis Familiarum Tesseris

Ad Familiaris iura Amicitix citantur!

Sed (*ad Panum Propositionem digressione reuocatâ*)

Absit, Panes vt Laicos hīc putauerint,

Quibus æquè Sacra ac profana tractantibus

In abdita *Abimelechi rimari mos & Fas,

Natis non frangere Panem Sacerdotio sed auferre.

** I. Regum 21.*

Fatale Macedonico Militi fecere Omen

Visi Panes, introrsum Sanguine rubescens!

Curtius

ET

ET H O S

Aëtior: 1.

Ager Sanguinis Iusti, iniusto empti
Sacra initiatis Militia in Commeatum produxit!
Illis *Venditi Magistri* è Noualib⁹ prouenit hæc Annona!
In alimoniam & Symbolum * CONCORDIÆ
ex utroque conflata.

*S. Au-
gust. Ex
granis &
acinis cō-
fluctibus
in unum

Verumtamen:

Genes: 9.

Matt. 23

Luce 8.

Sobriæ Hilaritatis è Sacro Cratere
Profana haud libauerit Temulentia;
E Noëtica Plantationis vuâ biberint,
Bacchi Hederam Adorantes Arioli.
De *Genimine Vitis Nazaretica* pressus Liquor
Novus noui vsûs defluxit in Utres.
Pura isthæc *Sinceritatis Azyma* & Sicera
In sinceris Animæ cōacescit in Vasis.
Errem: Nisi PANIS & VINI Traditio
Deditionis hîc Te Tuæ arguit.

Sueton.

Expugnate Subactæque PRÆSVL
Circumfesso Votis & Studijs Applaudentium,
Velis nolis succumbere necessum est.
Apponat Conuiuantibus Otto Vitellius
Laboratos Auro, ad pompam exquisiti luxûs, Panes
Aut frugi Hominem oportere esse (dictitans) aut Cæsarem.

Ipsè ex Neutro Imperator

Tam oblitus Maiestatis, quàm Frugalitatis inmemor,
Ab utroq; se non remouit extremo.
Ohe: Submouete Mensam & Donaria
Ædilis Curulisq; præfecturæ Custodes.
Non iactantiæ aut Necessitatis hæc Largitio
Sed Ritûs est.

Duos in præsens Panes

Plures alios aliàs, nec Rogantibus erogaturus;
Vt qui in Nomen & genium NICOLAI trāsierit.
Eius se ad Exemplum & Manum, componat.

X I I.

FACES BINAS ACCENSAS INAV-
GVRANTI OFFERT
CONSECRATVS.

A. N.

Et FACEM Ceræ Virginis

Castis adhibet Cæremonijs VNCTVS DOMINI?

Hoc quidem est: *Suo Facem præferre Honori.*

Hicce Funalibus auctus diēs

Tua Conserenat HILARIA.

Illustre Hoc Vigilantiæ* Emblema,

Ferit animas, molli torpentes in pluma.

Tota quibus dormitur Hyems, dormitur & Æstas;

Tanta illis cum Consanguineo Lethi Somno, propinquitas!

In cassum†Cynicus Faculam accenderit

Per abrupta vitiorum ruentibus in præceps.

Ducant sui Exitūs pompam, nostri temporis

Noctilucæ;

Noctis & Lucis Ordinem præposterè confundant.

Tam Solis impatientes, quàm ignari Auroræ.

Operosis hîc Causarum Monumentis

Horarum distinguuntur Momenta:

Antelucanis Curarum Excubijs vigil Curia.

Plus Cere, quàm Sicera absumpsit.

Exequiarum Lugubria mortuales agat ad Cereos

Suo funeri & dedecori superstes Amentia,

Nihil Tuo cum fatuis Ignibus Sacrificio.

Procede Auguratò vt cæpisti, ad Summa.

Inextincta, *Lucentis Ardentisq; Fidei* Vadimonia

Hoc est: Geminam in Amicas Manus trade Facem;

Jllarum vnâ pyram Hæresi,

Alterâ rogam Schismati succensurus:

JTA FAXIT

Consummans Omnia

ET CONSVMENS IGNIS;

*Fax Vi-
gilantiæ.
Symbolū.

†Diogenes

Seneca.

Deut: 4.

(S)(T)(S)
G R A T V L A T I O
P A N E G Y R I C A .

Dedicatâ Honori Tuo Basilicâ ILLVSTRISS :
& REVERENDISSIME ANTISTES, restat, vt & Vo-
cem in vota consecres dedicesque, alteri gentis nostræ Traia-
no ; vt, quæ in proximo est, Ordinatissima Comitiorum Ce-
lebritas, benè ac feliciter eueniat: *Utque Omnia quæ facit, quæq; faciet,*
prosperè cedant, flli, Reip: & Nobis ; Vel si breuius sit optandum: Vt Vni flli,
in quo & Respubl. & Nos sumus. Constet acclamationi Nostræ ve-
ritas, quam nulla adornauerit asētatio, nulla extorserit neces-
sitas: REX IN ÆTERNVM VIVE. Decet enim
Inauguratum recens Pontificem (ne quid non ritè fiat) à fau-
stis comprecationibus auspicari. Ecquid autem, vel ad mē-
tem Reipubl. conuenientiùs, vel ad Vota Ciuium optabiliùs
precari fas, quàm longam Indulgentissimo Principi ætatem,
bellis & victorijs, regnandi tempora distinguēti. An vllum
ex eius annis reperiās, non aut bellicis expeditionibus memo-
rabilem? aut militaris gloriæ commentarijs non insignem?
Irrequieta, hoc est coelestis Regum indoles, irremissis boni
publici circumagitur momentis. Ita perpetuus quidam il-
lis ad beneficentiam motus inest! vt in cœli naturam, siderū-
que ingenium transisse videantur. Senatoriam Drusi quere-
lam audijmus: *Sibi, nec puero vllas vnquam ferias obtigisse, nedum Viro ;*
quum prætextam pueritiæ, anticipatâ virilis Togæ firmitate,
onerâsset potiùs quàm ornâsset. Præcox restituendi imperij
desiderium, festinata hæc illi ætatum discrimina induxit cō-
fuditque. Quantò id veriùs pro Te queri Patria potuisset,
Regum Actuosissime, cui idem propè, regnorum primus, qui
bellorum annus, quietis & otij interualla, strepentibus circū-
quaq; armis abruptit. Aliena meditantianxiè trophæa The-
mistocli, somnos aliquando excussere. Quid si eidem, non
trophæa sed prælia, non triumphi sed bella Miltiadis per quie-
tem occurrissent? Tibi Principum Vigilantissimo, non ima-
ginaria somnianti sed gerenti bella, tuendæ ornandæque Rei-
publ.

publ. in omnes imperauit curas, solus liber ac dominationis
impatiens amor Patriæ, Tuo securè conuiuientis in sinu.
Vt mihi identidem ad augusta Regiæ Inaugurationis Tuæ
Auspicia, cogitatione recurrenti, non tam ex ritu porrectus,
quàm arcanâ fatorum potestate traditus videatur GLADIUS,
nec in eam vsque diem, suæ redditus Vaginæ; præmonente
iam tum Fortunâ: nec Te hostibus defuturum, nec Tibi ho-
stes, in istam districti Ensis aciem, temerè, at non impunè
incurfantes. Quò me autem transuersum rapit impetus,
auersumque à Pontifice ad Principem, à Basilica ad Regiam,
ab Aris ad Solium? nisi quòd & hîc Aram Clementiæ sup-
plex habeat, cæteri Cortinam & Oraculum ac Delubrum,
Vicariâ Numinis Potestate inessum! Et quanquam in-
decorum haud foret, Tuis laudibus Tui Principis præco-
nia miscere, quo cum & Curas miscueris; eius inquam
Principis, cui cum nihil ad augendum Solij fastigium super-
sit, securus ubique Magnitudinis suæ, inumbrari non potest.
Auctoritatem Cuius non adimit, addit etiam de suâ. Suo-
rum decora sua ducit. Scit enim ornari se, dum ornat. Ga-
uisus admoueri grandioribus Aris PRÆSVLES, quos ipsemet le-
gisset: initiari Sacrorum Præsides & Custodes, eoque propa-
gari Religionis patrocinium, Vera regnorum firmamenta.
Habent hoc quidem liberale atque eximium Principes, quòd
NIHIL COGANTVR; Noster attamen, suo imperâsse genio vi-
deri possit, ne quid fouendis ornandisque Cuius pernegaret;
sibi ea se indulgere persuasus, quæ Suorum commodis indul-
sisset. Detestatus infame sæculis & nomen & effatum, quin-
ti ab Augusto Imperatoris: *Hoc agamus; ne quis quicquam habeat.*
Sapisset credo meliùs, tam benefici Numinis elimatus Ma-
gisterio, potiùsque (versâ mente) contendisset: Hoc agendum
Bono Principi: ne quis egere posset, aut Famæ, aut Fortunæ.
Redeo tamen ad orbitam Orationis, meque refero in gradum,
modò Initiatæ Dignitatis.

Vna hæc ad Tuæ incrementum Gloriæ, fieri poterat
accessio, vt Honor Honore cresceret, Dignitas dignitate cu-
mulatior proueniret. Superadditum Sacerdotio Pōtificium,

aucta est Potestas potestate. Euoluē, Apostolici Nominis
congeminas Literas: prome Oracula, exhibe Priuilegia,
DEO secundæ Authoritatis. En vt omnia Tuis contem-
perata virtutibus! (habet enim & Virtus suos numeros) Om-
nia Tuis Moribus consona, tenori vitæ, modulatè respondēt.
Jamque ille, si non hominum, at Fatorum torrens, Tuæ nu-
per, nec quicquam obstrepens aduersansque cymbæ, (quò se-
rius destinatæ mentis promontorium teneres) cedit ad extre-
mum, & velis obsecundat, exaggeratæ felicitatis Tuæ ceu ab-
sorptus in portu. Hoc celestis enauiganti Modestix Tuæ,
hoc Perseuerantiæ præmium debebatur. Redit ad Te quasi
postliminio prima Vaticanæ Prærogatiua Facultatis; redeunt
primæ ab Vrbe Gratix, quantumvis cum Xenocrate, Gratijs
non litasses. Adest idem ius, idem splendor insignium, qui
ante, idem Romanæ auctoramentum Curix quod ante, idem
stylus qui ante; Nam & virtuti Tuæ eadem facies, idem co-
lor, quò in omni fortunæ positione idem semper, nunquam
non Tuus, Tibique innixus videare. Tanta, Supremo Sa-
crorum Antisti ALEXANDRO VII. integritatis Tuæ fiducia, tan-
ta Moderationis inerat æstimatio, vt non ambigeret, Te sal-
uâ diligentix Tuæ ratione fuisse facturum (idque in Tui gra-
tiam) quod ineluctabili temporum calamitate, ne confieri
decorè potuerit, dispunctum est. Expectatum est itaq; tem-
pus, quo liqueret, non iam Te fasces ambijsse Pontificios,
sed tantisper fugisse, dum tranquillior rerum vultus, redu-
ctâ paulatim serenitate, Latinorum maiestati rituum, quoquo
modo responderet. Rectè ô PRÆSVL prouidenterque, præra-
pidæ aliorum festinationi, temporariam cunctationem præ-
tulisti. Consecutus insigni hoc Potestatis Tuæ temperamen-
to, vt Dignitates à Te non supercilio territæ, sed vltro manu
missæ, admitti ad Te rursus exambiant, Tuis rursus tractari
manibus, Tuâ iterum splendescere in Aula, Tuo iterum ex
nutu & arbitrio pendere allaborent. Quare ego illum ipsum
obicem moramque Tuis consilijs, nostris gaudijs interposi-
tam extitisse reor, quia diuturnâ annorum, votorumque pu-
gnâ, (quippe & gaudio sua vis inest) Modestix Tuæ Verou-
dia.

dia oppugnanda vincendaq; erat. *Ac sicut Maris Cœliq; temperiem* (ait ille) *turbines tempestatesq; commendant*; ita ad augendam Initiationis Tuæ gratiā, nimbium illum præcessisse crediderim. Enascentibus (vt mortalium ferunt vices) inter secunda aduersis. Præterquam quòd,

fnuidia plerumq;e patent, quæ vertice toto

Excessere solum, Solio Iouis addita—.

Id agentibus vt opinor Superis; quò solito maior & augustior, etiam non quæsitis Honoribus occursares. Quid enim? Sacrastum procurares cæremonias? Emerito Honori solennitatem adderes? paludamentum & purpuram, suos explicares in sinus? etiamnum Patriā, suis se inuolvente ærumnis. Infulam capiti circumponeres? Regio diademate, necdum firmiter stabilito. Pastorali manum scipione impleres? regni sceptro, inter hostilia ventorum, stipulæ instar aut calami nutante adhuc. Annulum ratæ fidei sponsores indueres? Rege & Regno, arctioris fortunæ ferreum annulum præferente. Tunc denique sancitæ decretæq; dignitatis Tuæ ius reposceres? cùm Te alius circumstaret labor, aliæ Te aliò auocarent Curæ, quibus Reipubl. salus, pax, securitas, legum tutela, ceu Atlante, sed extra fabulas, niterentur. Vidit hoc, quid autem non videret, pro ea quā Orbem temperat, providentia Regum oculatissimus, quum Te vnicum præsensq;e auxilium rebus fessis adsumpsit, delatā ad Te signatoriā Regni gemmā. Scitum nempè est: Magna negotia magnis egere adiutoribus. Et verò, Te tanto non imparem muneri satis ad vota expectantium, abundè ad gloriam decusq; Polono Nomini suffecisse, ille ignorauerit, cui ignota apud Dantiscum, Oliuensis Cænobij ascetico in recessu, frequens illa Paciscantium Corona, an Comitium illud illustre, maiorum gentium ac Principum Oratoribus Arbitrisq;e adornatum. Frigere scena illa, toto latè Balthico protensa, quî potuerit? tot Actoribus referta, tot spectatoribus circumfessa. Vidissem Te vti nam ex proximo, audissemq; in Ciuico illo eruditæ Trāfactionis theatrò, dum succinctæ rebus Orationi, gestum, oculos, vocem manumque commodares, dictionis elegantiam omnes

Comitatis numeros obéunt! Ecquæ illa agēdi grauitas, quæ dicendi, sæpè extemporalis Copia, & acumen? quæ celeritas agitæ mentis, in subita sese porrigens? qui sermo in sententias non coactus, sed totâ se libertate deuoluens! Age porro: quàm inaffectedata verborum sinceritas, quæ asseueratio in voce, quæ in vultu affirmatio! quàm in expedito consilia, quàm solers coniectandi vis, quàm felix ambigua interpretandi facilitas, felicitas explanandi? Quæ deinde experientia, vsu valida, quæ ratio disceptandi, quæ alloquendi Vrbalitas, quæ responsa, ad leges prudentiæ castigata? promptum deniq; ingenium, & ille mentis vigor in ardua experrectus, non absque auctoritate, Humanitatis officio delinita. Prorsus Diuinæ capacitatis est, hæc tam dissita, tam seposita, tam coniuncte, tam dilucidè, incredibili comprehensione in animum demittere, partium studijs intercedere, immodica poscentibus modum ponere, cedere in loco vt altius assurgatur, infectumque mox reddere, quidquid fieri non oportuerit; adhibitâ custodererum memoriâ, quæ in severo illo dimicantium conflictu rationum, censoriam arbitrantibus venêre in lancem. Hoc demùm est, suppositos incedere per ignes, hic labor, hoc opus est, plenum aleæ, plenum periculi & palæstræ.

Debemus Principi Prouidentissimo Pacis tempora quibus fruimur, ille consulit; debemus iuxta sapientissimo Senatûs-Consulto, Tibiq; ante alios, præsentem quietis maliciam, Tuis conflata Consilijs, prouisu, cautionibus communitam; dummodò *Fortuitorum capacissimo in mari*, quaterna illa Ventorum regna Regesq; totidem, æternis pactio num tabulis innixi consopiti que acquiescant.

At non intra hos publicæ vtilitatis fines, Tua stetit industria, Vir in omnem demerendæ Patriæ occasionem intentissime. Alteram Te prouocant in arenam, armatæ iratæque, malè foederati Exercitûs legiones. Quantò iucundiùs Tibi, quantoque expeditiùs, in pacato illo (vt dicebam) Oliuensiu Asceterio (non inani iam OLIVÆ Vocabulo) pacis oleas decerpere, pacis instrumentum condere, inq; publicas foederum sanctiones referre, pactâ ratamq; animorum armorumq; socie-

societatem, quam in domestica Militaris odij tela incurrere, nisi Te fata Patriæ in eum quoque scopulum impegissent. Quæ tum illa fuit rerum facies, quam visu foeda quam animo execrabilis! Diminuta Principis Veneratio! circumscripta Maiestas, posthabita Senatûs auctoritas, oppressæ Nobilitatis prærogatiuæ, eiurata Ducum obedientia; quodque his multò acerbius: sprete Religio, vexata Sacerdotia, occupatæ Ecclesiarum fortunæ, direptæ facultates, abacta iumentorum armenta, res familiaris pessumdata, fugati agrestes, Colonia dissipatæ! Taceo infessa Regalia, exhaustas Oeconomias, adempta Portoria, iniquissimâ præensione auctoritatis Vsurpatæ. Ita illis nihil sanctum, aut immune, nihil intactum, nihil vetitum! Exlex illa obsequij detrectatio, non metu Legum, non Regis reuerentiâ, non pudore suo componebatur: prælicet quidlibet agere, præse omnes coaspernari, se circumspicere, nihil non sibi deberi, suo sibi arbitrato soluere, ex usu iam habebat. Religiosam enim verò sectam hominum, commentitio ridiculæ Pietatis *Vinculo Colligatam*! Nam, & anguibz natura pulchrum tegmen indidit, quo sua dissimulent venena. Quid deinde? ô rem posteritati detestandam! Sanctum illud ac Ciuile bonum Amicitia, propè modum extincta, interceptis per viarum insidias literarum arcanis. Reseratæ priuatorum syngraphæ, patefacta quæ minimè deberent, erepta absentes alloquendi facultas. Hoc quidem erat: humanitatem è medio hominum tollere, nec barbaris violatam. Vsq; eadeò in Libera si quæ vsu iam Republ. de securitate scribendarum periclitati, excideramus Libertate, amicissimos quosq; eminùs conueniendi, sensa pectorum comunicandi. Et hi tamen ipsi, tunc se maximè tutores, vindicesque Libertatis, specioso ad iactantiam titulo profitebantur, cum vel maximè Libertatem vi & armis, officiosè præfocarent. Ac, ne ultra omnem audaciæ lineam euagati sæuirèt extra leges, lectis properè per turmas & Ordines, manu linguâque promptioribus, placuit bellicos creari Magistratus, qui Præsidentibus assiderent, qui lites & causas componerent, cogerent militariter circulos, adessent iudicijs aut præessent, ius dicerent; de salute de

Capite priuatorum censerent, supplicio addicerent, fontes æ-
quæ insontesque plecterent, nullâ defensionis, nullâ appellân-
di Maiestatem, nullâ intercedendi copiâ pereuntibus consti-
tutâ! Cæteri quibus plus fidei in Principem, stupore atto-
niti metuque, (constantissimos etiam percellente,) mutam il-
lam ac sedentariam assentiendi necessitatem, quo cum dolore
animi, quo cum totiûs horrore corporis perpessi sunt! Sic
in eo, sibi inuicem coniurâtium an peierantium tumultu, his
probantibus, quæ sanxissent, illis inconditè reclamantibus,
Ferri violenta potestas, confudit ius omne manu! Scilicet in tanto natio-
num discrimine, Nexuq; Foederatorum, ij supplicè Patriam,
manusque tendentem curarent? quibus ut translatitium in-
genium, & statio incerti Martis, ita nusquam & ubique Pa-
tria, auro argentoque inter stipendia venalis. Quid hîc age-
res, immò quid ex munere Tuo non ageres, erectâ in arduis
animi eminentiâ? Quò te verteres, aut quò non verteres, a-
uersurus vel euersurus exitiales regno turbas, palàm in Prin-
cipem obnitentes? Telum è visceribus Patriæ lentâ molliq;
tractatione extrahendum, Tuæ Opis artificium implora-
bat, in primis: mentem & manum adhiberes, hoc est: notâ
suetâque fandi scribendiq; dexteritate, iratos flecteres, exar-
mares armatos: *Viderent etiam atque etiam, quid molirentur, quò tende-
rent, quò spectarent? Meminissent: improbia defectianis comitem fieri peniten-
tiam. Redirent in gratiam cum Republ. cuius non alium fore statum fortunamq;
intelligerent, nisi quam ipsi fecissent. Cordi esse Parenti Patriæ, quid proxi-
mo, quid superiore anno egerint, tulerintq; quantum sanguinis Martiali in
campo integritati ac Saluti omnium Ordinum propinarint. Probè nosse Regem
Bellicosissimum, qua palmaris victoria trophæa, SZEREMETANA ad Cz-
dnouum è clade statuerint, perexiguâ (sed numerum supplente) virtutis manu,
cæso delectoq; superbissimi Hostis exercitu, Fortitudine in fastos æternitatis abitura.
Interim darent operam: ne, qui in Sago pulcherrimè effloruissent, fædissimè
obsolescant in Toga; Illas, multo erioris impendio emptas Laureas, Ciuicalque
suis sibi in manibus infringi patiantur. Turpe esse: Gladios tot palmarum inesso-
res, & adhuc hostili cade stillantes, otio hebescere, torpere situ, studio armorum
à manibus ad oculos, à labore ad voluptatem indignissimè traducto. Magni-
ficum contra, atque illustre: patrio more, patriâ virtute ac-*
cinctos

cinctos, sine æmulo, sine exemplo, secum certare, secum,
contendere, secum vincere. Quòd si exempla Fortium po-
scerentur, illa præstò esse: in Fortissimo Lithuanici Ducatûs
Cataphracto Equite, ad metas laudis bellicæ cursu effusif-
simo per depressa Moschorum capita euolante. Jrent igitur,
aut præirent, secuturis Commilitonibus, collatis in vnum,
Militiæ Corpus & animis & vexillis. Jrent inquam prælia-
res animæ, & isthæc agendi tempora, belligerandi opportu-
nitatem, certissimamq; Victoriæ elabi, ne sinerent, seque
rebus seruarent futuris. Illic belli neruum, illic spolia,
& manubias, illic gazam reconditæ supellectilis, & quæ illiûs
oræ eximia, terris aut syluis continentur, reperturi, aut ere-
pturi hostibus, non poenitendâ Laudum Opumq; auctione.
Cæterum sua illos in integro manere stipendia, iure æquis-
simo exsoluenda Militi, lucis & vitæ vsuram, denis (vt a-
iunt) in diem assibus æstimanti. *Fusta iuste peterent, nemi-*
nem non eadem volitum. Darent modò aliquid egenti exhau-
stoque ærario, darent Equestri Ordini, darent Ciuibus,,
darent sibi. Paciscerentur insuper breues admodum indu-
cias, dum reddita sibi Respubl. collecto in membra spiri-
tu, dati acceptiq; secum ineat rationes. His Tu, oranti
similior quàm hortanti, vel Pæno Militi iram actelum e-
ripere potuisses, nisi in malè auritam obstinatæ vecordiæ ma-
leuolentiam incidisses; inde meritis indignationem, vnde
gratiam debuisses. Frustra petitis à Decoro artibus, eos op-
pugnaueris, quibus vile quidlibet, quidquid inutile. Sua-
dentem appositè Sapiëntiam in præcordia admitterent? qui
humanioris literaturæ gustum corruperint, fastidio arro-
gantiæ Cessit Ciuilis Eloquentia, militari licentiæ, cessit
comitas conuitio, maledicentiæ taciturnitas triumphalis.
Tuo in rem accinente Sarbieuio:

Ad prima quisquis vulnere non gemit.

Solo peregit Bella Silentio.

Te enim mirer magis, an istorum improbem petulan-
tiam? Sacris æquè ac profanis infestam: sales insulsos, infi-
cetas facetias, quibus, plerumque Regij Primores Ministe-
rij;

rij, inolitâ linguæ intemperantiâ, proteruè carpere, in morem abiisset. Te intereâ, Patriæ rebus irremissè intento, facileq; verborum contumelias inuerecundis auctoribus condonante; neque ignoro: *Privata Odiâ publicis utilitatibus remittenda.* Equidem cum plurima operum sese efferant, pro quibus immortales Parenti Publico, agi gratias necesse sit; tum vel maximè, quòd solutâ lapsâque Castrorum disciplinâ, in statu pristinæ seueritatis constitutâ, hanc bellicæ impunitatis pestem, ex longa parendi dedignatione conflata, tristitiam at salubri ad posteros exemplo effugauerit; Sibi que in posterum & Ducibus militem reddiderit obsequentem. Tux adhibito Eloquentiæ classico, Eminentissimâ, vt est, Magnanimitate contestatus: Nolle se eos militantium in censu connumerari, quibus prona in seditionem audacia, nouandis quâlibet ex causâ rebus in promptu sit. Arma exuerent, qui iam ante amorem Patriæ exuissent. Castris actutum exessent pestilentes animæ, ne contagione latius grassante, ad cæteros idem virus perreptet. Perbenignè leniterq; agi secum existimarêt, quòd indeprecabile supplicium, commeritis, impunè liceat hinc abire. Alia stipendia alibi quærent, quibus plûs animi in Ciuem quàm in hostem. Mouendos è statione Martis, Martem linguâ, non manu profitentes. Domi duntaxat hospitibus metuendos, foris terrori hostibus haudquaquam futuros. Renuntiarent ilicò Regis Militiæ, qui suæ peruicaces malitiæ per diu noluiissent. Non se deinceps permissurum, vt *procaria Ducis anima inter infestos ferociter Milites trabatur.* Rationi consentaneum videri: mouendos bellico magistratu, qui Reipubl. Magistratibus extortâ facultate, ne quid salubriter in commune statuerent, intolerabili fastu, cominationibus, ac tantum non ferro contraissent. Maurorum tumultibus accederent, nati omnia per tumultum, atque insanos vociferantium clamores agitare. Habitos à se habendosque loco Hostium, quòd Hostilia in regni accolæ exercuerint; multò promptiores, computata agrestium capita quàm Hostium censere. Haud dubiò scientiores iam, rei frumentariæ quàm tor-

tormentaria; quum plerisque illorum notiora essent colone-
rum horrea quam tentoria. Eapropter renuntiarent
Militiæ, futuri aptiores Oeconomicae, cui spatium biennii
impendissent, irreparabili dispendio prouinciarum, cis &
vltra Borysthenem, miserè desciscientium ad Hostes, nostrâ
infelicitate felices, nostrâ nos socordiâ, addo & discordiâ
oppugnantes. Quin, & peccandi necessitatem ne obtende-
rent, liberâ ad partes Regias secessione, inuitati per exempla
& vestigia meliorum, illud vnice dolenterque sibi imputan-
tium: quod seriùs quàm Benignitas Lenissimi Principis po-
stularet ad ingenium obedientiæ rediissent. Porro affinita-
te comunicati criminis, quoniâ tueri se non possint, efferrent
secum suas labe, nullo satis sanguine eluendas. *Excederent*
Castris, priuatum degeneres, in publicum exit. osi, nec spei quicquam, nisi per
discordiam pellicentes. Sibi verò: Non aliud Militiæ leuamentum videri, quàm
si certis in reliquum legibus incatur. Cæterum par esse: militari no-
tatos ignominiâ, in alias peregrinari terras, qui armorum
decus, defectionis dedecore infamâssent. Saperent posthac
exauctorati; ac suam cuique Ordini auctoritatem intactam
illâsamq; haberent. Simul discerent militare ad leges Hone-
sti, præsentē dehonestamenti opprobrio mulctati. Scirent
postremò: *Regibus latè Dominantibus, nec desituras bello, Præliantium manus,*
nec defutura præmia bellatoribus. Quamobrem discederent, quo-
quo vellent, audirentquē Pharsalicam Lucani tubam, Fœde-
rato Cæsariani militis receptui canentem: L. 5. v. 323.

Vadite, meq; meis ad Bella relinquit Fatis:

Inuenient hæc Arma manus, Vobisq; repulsis.

Tot reddet Fortuna Viros, quot tela vacabunt.

Eum itaque in morem Martialis animæ Princeps, fi-
de & obsequio melioribus in gradu relictis, aut repositis: pro-
piores culpæ, irreuocabili imperio (quod vindicandæ Maie-
statis interesset) amandauit. Quando (non tacendo Taciti
iudicio) ne morbos quidem veteres & diu auctos, nisi per
dura & aspera coercueris. Tuis PRÆSVL Accuratissime, vt
plurimum conatibus, & vigilijs, Tuis cohortationibus & al-
loquijs, redijt sua Reipub. forma, Patribus Conscriptis vene-
ratio.

ratio, Religioni immunitas, Pontificibus Honor, obseruantia Sacerdotio, Templis cultus, nitor Sacrarijs, pace redditâ, restitutus. Redeunte omnibus terrore & metu, & voto imperata faciendi. Corruit tandem illa Castrensis Contumaciæ arx, nouis obstinate defensa Gigantibus (Jouem si possent detracturis in terras) Tuis aggressionibus & cuniculis expugnata, suis ruderibus insepulta; quibus aliquis inscribat Viator. *Discite Iustitiam domiti, & non temnere Reges. Nec nos terret, malè olim usurpatum truncatumque carmen.* Luc. lib. 1. v. 824.

Imminet Armorum rabies: Ferriq; Potestas

Confundet Ius. Omne Manu: Sceleriq; Nefando

Nomen erit Virtus. Multosq; exhibit in annos Hic furor!

Magnum quidem illud sæculo nostro dedecus magnū pectori vulnus impressum est! Respub. pænè capta inclusaq; ne se in vsus Ciuium comouere posset, ademptâ sentiendi, quæ vellet, & quæ sentiret dicendi Libertate! Ablata simul Mitissimo Principi seruandorum hominum Potestas! ereptumq; illud in principatu beatissimū, quod à nemine cogeretur. Si tamē hæc sola erat ratio, quæ Te, Regū Animosissime ad Ciuilis mali curationē admoueret. propè est vt cum adoptati Principis præcone exclamem, tanti fuisse. *Corrupta est Disciplina Castrorum, vt Tu Corrector, Emendatorq; contingeres, inductum possimum Exemplum, vt Optimum opponeretur.* Vnde autē optimum nisi ab Optimo peteretur? Quantum est, extinctam refouisse Militiam? refouit! Ex sanguinem & exanimem, animasse? animauit! mores alios, alios sensus, naturam ferè aliam Stipendiarijs induxisse? induxit! antiquis instituti legibus adstrinxisse? adstrinxit! Et adhuc initiati à Se Exercitūs, renatam se Auctore fortitudinem, perarduā in Russiam Expeditione non educeret? Viarum incommodis, locorumq; asperitatibus, quibus Hominum quoq; (teste Curtio) *durantur ingenia* non acueret? Non, Bellatrici Aquilæ pullos congeneres, Orientem exploraret, ad Solem? Non hodie primū se Magistro didicit: *Inter Belli discrimina, Armorum Virorumq; faciendum esse discrimen.*

Quonam autem Tuo, an Poloniæ fato fieri dicam Candidate ANTISTES? vt necdum hīc etiam tempestiua Dedicandæ

dæ Vituti Tux eueniant Statua? Perinde ac si vocem Publicæ Necessitatis accepisses: *Pacis Negotia, speciosius per Otium transigenda.* Reposito paulisper sepositoque Sacrarum apparatu rei Viatorum instruenda supellex. In Hostico (sic astra monent) Principi, Principisque Sequacibus hyemandum. Abesse Te, à Tui Comitatu Principis, nec Tua finit Pietas Fidesque, nec ratio permittit Ministerij, Curarum æquè Comitem ac Viarum. Cedat tantisper Neomenia (vt vocant) Tuba, Martialibus Classicorum sonis. Lustrandus latè Oriens, armorumque illustrandus fulgore: adeundæ Orientis Prouinciæ, nec magis pedibus, quàm laudibus peragranda. Exturbandum præsidij, effugandum Castellis hostem, vindicandas Ciuium ditiones, arrogantissimi aggressoris ferociâ oppressas! Quin ipsos etiam Præsidarios, Nostri Urbibus atque arcibus hostiliter impositos, Polonæ aliquando fortitudinis, acri impressione admonendos. J sequere, Cordatissime ANTISTES Magnanimum Bellatorem, magnis passibus, vel ultra ferreas Chabri Columnas euadentem. Fuerit ante hac solenne *Terminos erigere, & stantibus Prouincias discernere Columnis. Profectò fallitur quisquis Terminos immensa glorie, metitur spatium, quod transitur.* Juit alacer lætusque virtute Militum, eò arma inferens, quò nemo Principum, nemo Regum Poloniæ accessisset. Manu ille quàm nomine audacior Boleslaus A V D A X, expugnatâ quondam Chiouiâ, profligato Wschewoldi exercitu, non ultra Borysthenem audendo progressus, perexiguas victoriam finibus circumscripsit; ceteriori populatione famam colligens & laureas, immani mox sæuitiâ & parricidio polluendas! Prima & Magna CASIMIRIS Nomina vt non adimo, ita vim remque Vocabuli istius, nullâ antecedentium iniuriâ, transfero ad hodiernum Jagellonici Sanguinis & Nominis CASIMIRVM. Inaccessa, & vel Audacissimis inausa, Tuis Ausibus, Tuis Accessibus & Successibus seruabantur. Tunc si aliàs Regum Gloriosissime, Fabricij & Scipiones, & Camilli, Tuis ad vitam reuocati exemplis Tuo in Exercitu conspecti sunt! Tamennè adhuc Militares Copiæ, sub Tanto Principalis Patientiæ exemplo non durarēt? non vltro citroque
Tua

Tua certatim ad Signa & Aquilas conuolarent? non piaculi loco ducerent (illi etiam qui principio restitâssent) pedem referre? antecedentem non sequi, non pericula iungere, non puluerem bellicum sudoremque miscere? *Etsi autem pleraque in Exercitu, Absentium quoque Regum Auspicijs & Consilijs, quàm telis & manibus gerantur;* Adesse Tu tamen malueras Tuo Agmini: ne iam, Tuorum fides & industria, per internuntios & interpretes, sed ab ipso Te, nec iâ auribus, sed oculis probaretur. Quo quid felicius Tuo contingeret Militi vel ad præmium, vel ad decus? Quocirca, ruere in discrimina, obijci periculis, Vallum inscendere, addere se assultantibus, ambire Ciuiças, mortes oppetere decoras, sanguinem, vitam, spiritum denique Patriæ impendere, inter ludicra Militarium laxamenta curarum habuere. Itaque; (quod in suo Imperatore suspexit Plin.) *Perinde Summis atque Intimis Carus, sic Principem Commilitonemque miscueras, ut studium omnium laboremque, & tanquam Exactor intenderes, & tanquam Particeps Sociusque releuares.* Et quoniam vna simplexque bene merentium, & fortiter morientium conditio est, feres æquo animo, (ut cætera isthic tulisti) **PRÆSVL** Tolerantissime, Fortium Virorum decora Tuis addi, Tuaque inter encomia memorari acta Militum, quorum spectator ipse laudatorque exstiteras, in illa Martis area: illis stantibus, alijs rem agentibus, his cadentibus cœlo teste! Te interim (nam & hoc in Tuis laudibus ponitur) supremam expirantibus ferente opem, instante morientibus, atque expeditum iter animæ comprecante; id quod à Tua non abhorreat Pietate. Nam quod attinet Principem, Felicitati hoc Tuæ apponis, exornari illius Nomine paginam Tuo Nomini dicatam, admitti que ad præconia, quem prius in animum profundâ veneratione admisisses.

Principium Ruslico-Moschouiticæ Expeditionis mirer, an finem? Magnum est perfrigidâ anni parte, rigescente brumâ, sæuiantibus vndequaque ventis, militari sub tecto perseuerasse! plus tamen est, non timuisse, ne perseuerare non posses; eò loci, vbi feræ gentes, non telis magis quàm suo cœlo, suo Sidere, suis moribus armantur. Perferente

te omnia, superanteque Tuâ Tuorumque; alacritate. *Nec fuerant duri Tanto sub Rege Labores* algoresque, ut vel tunc omnibus oppugnati elementis discerent: Non esse molle Virtutis rudimentum. Exercitu Regio, nihil non Regiæ Fortitudini tribuente: seque ad tam sublimis Tolerantiæ, humano augustius Exemplar fingente formanteque. Fuit dum priscis Imperatoribus prospexisse duntaxat castra, breuemque; militiam quasi transisse contentis, (quum hostem vix eminens vidissent) popularis adulatio immensæ fortitudini gloriæque daret. Nostro Bellorum Bellatorumque Experientissimo, à primis iam inde Pueritiæ confinijs, omne genus armorum callenti tractantiq; non paucorum mensium, sed annorum in se redeuntium orbibus commensa belli Gloria militauit. Inde vnicè demirandus, quò etsi Triumphali Patre genitus, Fratri Victoriosissimo successisset, tamen bella nec prouocat ex facili, nec timet. Eam ipsam Expeditionum difficillimam, eoque incomparabilem, haud aliter adornaturus; nisi quòd sic è publicis Patriæ rationibus expediret Reipubl. interesset. Robur & florem Veterani Exercitus, in vastissimos Camporum tractus importari fas erat, quò lacerum discerptumque; Regni Corpus, quàm citissimè coalesceret. Accedit, quòd numerosa illa multorum Capitum bellua, multis egeret manibus obtruncantium. *Parum namque, tuta est Maiestas, sine armis,* in tanta vel rustici Martis præfidentiâ. Nisi quòd vniùs oræ, non vniùs iræ populi, modò armis, modò solâ armorum ostentatione ad obsequium & deditionem reuocandi. Præmittendum Ultricis Potentiæ Terrorem, sed Fiduciæ excubijs circumseptum. Inferenda Fascibus, Pacis Olea: Secures & Virgæ, Fasce Jagellonicæ Mansuetudinis prætexendæ. *Securitas mutuâ Securitate pascenda est. Armis enim irritantur Arma.* Metus & Pauor odiosa ijs numina qui se peccasse meminerunt. Ponet nihilominus quod extulit superbè caput, Rustico-barbari furoris Hydra, non minùs in suas neces, quàm in laudes Regias hodieque fecundâ! Minùs iam timetur, Moscho-uitici Draconis assumpta additaque monstro facies, cum illa ipsa vtriusque populi consociata perfidia, quouis portento

immanior, timeri desierit Nostro Militi, ex longa periclitandi assuetudine metum omnem periculorum exuente. Nec iam ex vano creditur: Virtuti hoc Regiæ à primis bellorum tentamentis, prouisum Diuinitus irritamentum, ut illic Spei publicæ iactam anchoram fundaret, ubi primum tyrannica peregrino-domesticæ tempestatis violentia, concussam Fortunæ nostræ prætoriam iactasset. Nescio tamen, an aliàs luculentiùs, Natum se **CONSTANTIA** patefecerit? quàm cum in medio Ciuilis procellæ turbido, fluctuante iam ac tantum non absorptâ Reipubl. Naue, Clauum semel prehensum constanter tenuisset; Te interim Principe Regni Ministro, Vela in omnem Necessitatis usum scienter obliquante: excubantibus perpetuò in Senatoriam vigiliam oculis; ne nostræ Felicitatis Oneraria, latentis Discordiæ in scopulos deferretur. Sed recentioribus insistendum. Pertinebat enim ad Gloriam Laudatissimi Principis, frenatus traiectusque Borysthenes, ingentia tergo bella transmittens, non accolarum, magis peruicaciâ quàm Suâ ipsius Magnitudine formidabilis. Quid verò deinceps metuerent sequaces Copiæ, hoc Securitatis vnicum Sidus intuentes? An impedimentis rei bellicæ timerent? quibus tam planum expeditumque ad fortunam iter patefceret? Quantum à Nostro dissimiles, qui *non Albanum Lacus otium, Baianique torporem & silentium ferre; non pulsum saltem fragoremque remorum perpeti poterant, quin ad singulos ictus, turpi formidine pallentes exhorrescerent.* Taceo superatas consilio paludes, transmisso amnes, emensa viarum aspera & confragosa. Non ingredior inextricabiles Hercyniæ sylvarum Labyrinthos, cæcasque horrentium dumetorum ambages, hostemque nota inter abdita sylvarum occultantem sese, ne in solem & aciem prodire cogeretur. Feras diceres, non Milites, ita suis inclusi latibulis tenebantur. Non obscuro metu confessi: Polonorum se viribus & viris pares esse non posse. Profunda sylvarum infederunt, egregij sylvarum cultores custodesque; Veriti credo Stipites illi, ne quibus obtegebantur arbores, in Trophæa Currusque Triumphales, Victoribus cederent; Sylvarum ipsæ in Lauros & Palmarum nemora repente verte-

ren-

rentur. Nihil ignauo stupori illi cum stratagematē Premi-
slai nostratis, truncos arborum, militari commento obarma-
tos, Morauorum Exercitibus ad terrorem opponentis. Sic
in Hostico quæsitus diu Hostis, pugnacibus Polonorum Co-
pijs, sui copiam non fecit. Hoc ipso minor, quòd Præliari-
bus animis Campestem belli Gloriam inuidisset. Nihil iam
in Tua gesta, Fortunæ ac Tempori licebit, ex quo illam fa-
ctis ingentibus, hoc, benè merendi perpetuitate subegisti.
Id planè est Posteritatis, immò Æternitatis negotium a-
gere, Famamque Sibi, Heroico adoptionis iure, Heredem
scribere, ad consequentis æui memoriam fastosque trans-
mittendam. Horum aliquid si egissent otiosi Romanæ Pur-
puræ gestatores, quasi prolatis imperij limitibus, quos non
sibi arcus & statuas? quas non Triumphi moles, & fastigijs
Templorum altiores Titulos arrogarent, vrgerentq;, & quasi
meruissent, putidè lætarentur; in perniciem Ciuium ire
paratiores quàm in hostem.

Parum erat Nostro, PATRIS PATRIÆ Nomen
(quod cæteri ab arrogantia, ipse à Moribus & Natura acce-
pit) nouis in dies argumentis, memoriæ nostræ infixisse;
nisi eundem hunc Ciuicæ Charitatis popularem Titulum,
& rem Vlturus, oppressoribus Patriæ, vel extra Patriam o-
stentaret. An vllæ igitur, pro tam laboriosa & exercita-
tione PARENTI INTEGRRIMO referri Gra-
tiæ pares possint? Intelligimus iam, quàm æterno Anna-
lium Honore dicari oporteat CONSERVATOREM
SVI ORBIS, non tempori alienissimo, non Ætati, non
Saluti parcentem Suæ! Laborem verò bellicum (credetne
posteritas) inter Seniorum, auocamenta Operum reputan-
tem!

Et poteras Tu quidem Regum Prouidentissime, fecif-
se isthic Felicius aliquid, nihil Sapientiùs cautiùsque, quàm
quòd (Superis Comitantibus) desiderio reuocantis Patriæ re-
diturus à scena Martis, viuam spirantemque Fortitudinis
Tuæ Imaginem Tuo Militi reliquisti, vt sub oculis præsto
esset mentis Regiæ Idea, ad quam assiduò se componerent,
inde

inde lineamenta transumerent, inde Spiritum vigoremque in se traherent, quò ut minimum Tux absentia tadia perlen-
tiscerent. Deinde quòd Fidissimo iuxta Fortissimoq; **STIL-
LICONI** Tuo, immensa Glorix maria Nauiganti (ve-
henti que alterius Fortunam Theodosij) Vicariam armorum
Potestatem tradendam decreuisti, eam prosperitate, eo euen-
tu prouentuque, quem à Vetere Militia Magistro expecta-
ri par erat. Ita Sortem Rotasq; Exercituum temperante,
ut Regis imperia in opere exhibeat; Vota Reipub. factis æquet,
Commilitonum ingenia Victorijs acuat, *Bella Mementis con-
stantia*, suo moderetur arbitrio, ne quid à se decretorijs Fato-
rum tabulis debeatur. Faxit Pacis Bellorumque Imperator
DEVS, ut, quam Suo Sibi nomine ominatur Coronam,
eandem in Suorum Operum Coronidem, felici molitione ali-
quando transferat; igniarium Seruilis Iræ fomitem, tot an-
nis iam fumantem durantemque in bella, rebeli perduel-
lium sanguine restincturus. In reliquo: redeundum & Ti-
bi **PRÆSVL** Nominatissime, Viarum indefesso, laborumq;
impigro; neque tantum coeli soli que illius, sed & hostis in-
iuriam iacturamque perpeffo; redeundum inquam ad Cor
Patriæ, cui Animum & Calamum, iam diu deuouisses, do-
mi Militiaque vectigalem.

Sacris **CASIMIRI JAGELLONIDÆ** Vesti-
gijs insistentes fortè per hyemem Aulicos, geluque torpentes,
repentè incaluisse, fama est vel ipsis Templorum pauimentis
inscripta. Quin te pariter Jagellonia Maiestatis Comitem
Vigilemque, in austera quoque Orientis plaga Hybernā-
tem, algere haud oportuit, tam Contiguum Continuūq;
Tuo Principi, Sux Amore Patriæ vel inter algores conflag-
ranti. Illaturo denique (quæ Hostem debellaturis Voto-
rum Summa & caput erat) illaturo inquam suam barbaris hye-
mem; nisi solito citius mutatis Anni vicibus, remisso frigore,
tepescentibus lacunis, fatiscente glacie; dicamné, Militis No-
stri vicino ardore solueretur Hyems Moschica, patrocinata
Suorum trepidationi & latebræ Exercituum, ut nec elici è
Syluis voluerint galeati lepores, nec Sylux potuerint obsideri.
Eò

Eò hæc attinent à me paulò altiùs repetita, non quòd singula confectè, singulis vix æquanda voluminibus, sed vt palam constet, quàm illustre, quàm magnificum Tibi implicatissimis Reipubl. negotijs intento distentoque, capeSSenda insignia Dignitatis Tuæ, ineuoluta huc vsque tenuisse! quia fruendum Honorem ante Salutem Patriæ non ponebas. Adeò Tibi erat vel merces non habere mercedem, vel Honor Honoribus caruisse; dum adhuc pressa ex Ciuico-Hostilibus armis Russia, scissili palliastro squaleret, Manum & ferrum Principis imploraret. Sufficiebat tunc Tibi, arcana Virtutis purpura, quæ ita Honoribus auge-
tur, vt ipsa Honoribus altior, Honoribus lucem addat. Placet iam rimari in causas procrastinatae Dignitatis. Et enim: Cessit Toga Armis, Ara Focis, cessere Pontificis ornamenta, Reipubl. incrementis. Ne non ante impleres Infulas, quàm omnes Fidi Aulici numeros implèsses; priusque Summum Regni egisses Ministrum, quàm Pontificem. Egregius ille Comes Virtutis Honor, abesse à Tua, aliquantùm voluit, sed vt tarditatem sublimitate compensaret. Neque enim diutiùs moratur Honoris palmam festinata Virtus.

Benè habet. Dilatæ hæctenus Inaugurationi Tuæ, ipsa prorogati temporis impendia fecere pretium! vt non ex vetere effato, sed Tuomet experimento compertum sit: *Magna Constare Internatlis*; adeoque suam & Honoribus inesse Ætatem, quâ lentè maturescant, ad feracem Meritorum Autumnum. Non magis enim inter Belli Negotia, & Triumphi Diem, quàm Laborem inter ac Præmia, spatium intercedere necesse est. Priuatorum atq; Egentium est: Citò ac perperam mereri, vt citò ac temerè potiarè. Generosis Mentibus, postquam in Suam Suorumque Spartam impensè laborassent, stipendium penes Rectè-facti conscientiam. Honores nec à limine salutârunt, qui in occupandis Honoribus, celeritatis gratiam aucupantur. Audax atque inconsultum est: Exiguo ac pertenui Meritorum Viatico, ad arduam Honoris Prouinciã contendisse. Felicem ego Te

hoc nomine compellauerim PRÆSVL Moderatissime, cui ita
nasci, ita educari contigerit, vt prælauta Honorum in Do-
mo genitus, nec Fortunæ egeas de Tuo Fortunatus, nec ad
Limina Honoris peregrinari opus habeas; cū intra Dome-
sticos Penates, HONORIS ÆDEM reperias, longo
Ætatum Senio Venerabilem & Sacram. Nec propterea ta-
men, situ Annorum obsoletam, quod Gentilitio Vetustatis
iure colitur semper, semel à Maioribus Dedicata Tuis. Sæcu-
la & Anni non officiunt Virtuti. Tota illi ex antiquitate Glo-
ria. Lucorum quoq; Senia, olim Cultui ac Venerationi fuere.
Veteres illi Romanorum (auctore Claudio Marcello) quod
negarent fas esse, VIRTUTEM atque HONOREM
vno Templo, iisdem Aris Focisque Venerari, indiscretis
saltem parietibus colligarunt; vt esset Custos ad Honoris
Cellam Virtus, neque Honoribus negaret aditum, quos
ipsa faceret adeuntes. Genuinum PRAZMOVIANI
Generis Virtutisque Schema! è Domestico Recti Moris ap-
paratu depromptum, nec tam coloribus, quàm animi Do-
tibus adumbratum. Non perinde enim Timanthi peni-
cillo exprimitur, quod Moribus exaratur: effingitur Simu-
lachris quod spirat in Actibus, mutis committitur pagi-
nis: quod linguis Omnium celebratur. Vbi enim illustrius
aut perennius Virtuti cum Honore commercium? Vbi Me-
ritorum Dignitatumque confociatio luculentior? quàm in
hoc perantiquæ Nobilitatis, Probitatisque Domicilio? Hinc
Sénatorij Magistratus: Hinc Militaria Honorum Insignia,
Palatinæ Curules, Castellani Splendores, Clauæ, Vexilla,
Castrorum Fasces, Terrarum Præfecturæ, Tribunalitia
Subsellia, Togatæ Armatæque Palladis Honoraria! Hi Pri-
mis Ecclesiarum admoti Aris, Illi idonei Castris, Isti Ar-
cibus & Propugnaculis impositi: Illi Prouinciarum Orato-
ribus adlecti; Factis & Fastis, Maiorum Decora contutati,
Minoribus tradidère. Errare ad Maiestatum Augustale non
dabatur, quibus peruia Curia & Senaculi Limina Adyta-
que obtinentibus, ad Regiam & Solium iter SOLE Æ fe-
cissent Gentilitiæ, Regalis Beneuolentiæ Martiale pignus.

Cogi-

Cogitanti mihi, qualem quantumq; esse oporteret, Primum Intimioris Consilij Administrum, Cui non modò Pacis Bel-
lique Momenta ad trutinam exigere; Molem Curia Suos ru-
entem in Humeros, inflexâ excipere Ceruice, non modò
nutus, ac Iussu Principis, verum Sensa etiâ, Cogitataq; prope-
modum, solerter prænosse, ne dicam imperata exequi cōcelsū
sit. Tu ante alios memoriæ occurristi, quem à Paternâ Disci-
plina, primo Annorū Tirocinio excultum, illustrior meliorq;
Aulæ genius, altioris Prærogatiuæ Ministerio aptabat; donec
currentibus immò indolem præcurrētibus Annis, quod taci-
tâ pollicebarē sponsione, præstares in Opere Curiali. Quan-
tâ igitur Humani Diuinique Juris intelligentiâ eruditum?
quantâ Patrij Codicis Legumque Ciuium peritiâ instru-
ctum? quàm multiplici subitâque affluentem Eloquentiâ?
ingenio præstantem, Prudentiâ præcautum, æui animique
præualidum esse conueniat? Cuius humeris inclinata re-
cumbat Domus Publici Consilij, Oraculum Reipublicæ, Le-
gum Conclaue, Lar Inclytæ Libertatis, Officina Gratiarū.
Tua hæc sunt Vir Consultissime, Senatoriæ mentis admini-
cula, vel si maius Fulcimenta, quibus Maiestas Dominan-
tium tutò incumbens Libera Solutaque Sibi tantum vacet,
postquam Te assumpsit, qui erga omne Hominum genus
Vice suâ (nam nec Atlas sine Hercule) fungereris. Funge-
ris enim sufficisque Vnus omnibus, in tanto Negotiorum
accessu recessuque, vt labore refici ac reparari videâre! Vt
enim expetitis Procerum Honoribus deseruis! Vt Prouin-
ciarum Desiderijs, vt Singularum etiam Ciuitatum (quod
cum Optimo Romanorum Principe, commune Tibi)-vo-
tis & precibus occurras! tam alacer, tamque erectus; *nulla
vt in audiendo Difficultas, nulla in Respondendo mora aut fastidium interce-
dat. Statim adeunt, statimq; dimittuntur.* Videmus vt Curialibus
exsolutus Curis, Principales è vestigio resūmit! Vt recon-
liet æmulas Ciuitates, vt Iniquitatibus intercedit Magistra-
tuum, poenis Legum ad paucissimos, Metu ad omnes per-
tingente. Vt denique Causas Religionis, Quiritium Postu-
lata, Supplicantium Codicillos, inter Suarum Otia Remissio-
num

num euoluit! Ne & Beneficio suo gratiam ex difficili conciliet, diesque ei omnis, summa cum utilitate Reip., summâ cum laude Suâ condatur. Rectè Cœlestium æmulam Orbium nuncupaueris Aulam Studiosissimi Antistitis, & illa operosæ Mentis penetralia! Ita isthic suis omnia Temporibus ac momentis continenter librantur! Nisi quòd Antipodes procul habeat, qui ex Catonis animaduersione: nec Orientem vnquam viderint Solem, nec viderint Occidentem. Tanta illic diuidui Laboris obeundi consensio, intam discorde argumento! Credas Apum examina certatim in commune melliti operis laborantia, Te Arbitro, Te Exactore: in tantum iam ipsas Quietis contrahente Horas, vt Frugalitatis & Parsimoniæ Commendationem Legesque, ad *Publicanum illum Mortalitatis Somnum* extensas esse volueris. Morem gesturus monenti Stoico: Circumscribendam esse Noctem, & aliquid decerpendum, quod ex illa in diem transferatur. *Virtutem non contingere Somniantibus: Discendam esse. Cuius hoc pretium est, nequaquam Pretio capi posse.* Pridem hæc Tu Literatissime NEO PRÆSVL, non tam ex Togati Sapientis monitu, quam è Patriciæ Eruditionis Instituto haufisti; anxie à Te ipso exigens, quod illi fuere, qui Te solo Nascendi Ordine anteissent. *Recurrit enim ad Similem Suorum Imaginem Præstantissima, quæq; Indoles, moribus non vultu referendam; Et ad Maiorum Gloria imitationem, veluti quidam ad Solem Flores arcano rapiuntur ingenio.* Premis hodieq; impressa ad Exemplum Excellentissimi Parentis Tui Vestigia. In quo, nescias vtrum maior fuerit Ciuilis Fortunæ Dignitas an Religio? Honoris præcellentia an Virtutis? O quæ illa Morum grauitas Comitati non officiens! quæ Loquendi elegantia! differendi Acumen, Maiestatis Venetatio; cæteraq; Senatorij Cultûs Decora, Illibatæ semper Fidei Calculo consignata. Quod enim Comitium? qui Procerum Conuentus, in exitium vel exilium Hæreseos coactus? Cui Auita PRAZMOVIORVM Pietas, non adfuerit, non voce, non suffragio, non manu præiuerit? arcendæ non assenserit, proscribendæ non subscripserit? Quàm Honorificum Tibi Tuisque! etiamnum in reconditis Vetustissimæ

Memo-

Memoriæ Diplomatis, circumferri Vestra Nomina, Sectæ
Dissidentium Degeneri inimica. Illud Contumaciæ Rudimē-
tum, quā Terrestribus Notariorum Sigillis pressum oppres-
sumq; quā Castrensis Curix calamis punctum expunctum-
que abcessit: relictā facti Gloriā (quæ Vestra est) penes
Authores, in publica Terrarum & Castri monumenta Suo
merito relatos. Nota loquor, peruulgataque Nobilissimo
Ducatu Mazouix, eatenus quoque Felicis, quod Suorum
Culturæ Noualium aduigilet, nè quā *Infelix Lolium* A-Catho-
licæ Nouitatis pullulet primā extinguendum in herba. Olim,
tam infesta Virtutibus fuere tempora, vt *Optimi quiq; otio aut si-
tu abstrusi, non nisi delationibus & periculis, in lucem ac diem proferrentur.*
At Nostræ Felicitatis Temperator, Ministerijs Reipub. Suisq;
Meliorum è censu legit prouehitque, & ostentat, quasi spe-
cimen & Exemplar: quæ Sibi Secta vitæ, quod hominum ge-
nus placeat; vt potè, Cui Beneficijs potius quàm remedijs
Liberæ Gentis ingenia, certum sit experiri. Patuit hinc Vo-
bis Honoris Gloriæq; Campus, Fortes Animæ, germanā Cha-
ritate Virtuteque Coniuncti, (SAMVELEM & AL-
BERTVM alloquor venerorque) Illum Regni Curialem,
Hunc Voithyniæ Vexilliferos: non ferre tantum aut præfer-
re ad pompam Regibus Prouincijsque Signa Martia, sed ea-
dem inferre Hostibus, & conferre manus manibus, Fatif-
que & Mortibus occurrere Paratissimos. Etsi autem: *Ne-
mo non quotidie* (quiritante Senecâ) Consilium mutet aut Vo-
tum. Vos attamen in omni Actu Vobis suppare, Vobis
constantes, nec iam studio Militares, sed more, immò Ori-
gine, vsuque Natalium eò perducti!

Ferunt Megarensium populos ad Sepulchra Maiorum,
Comitia instituere, Oraculo monitos: *Vt si res prosperè geri de-
siderarent, referrent ad Plures;* quasi multò Plures Viuentibus
Defuncti censerentur. Palam est: adornari à Te Illustre
Honoris Comitium PRÆSVL Ornatissime, in quo delibe-
ratur: Non iam quid Tu Reipubl. sed quid vicissim Tibi
debeatur a Republ. cum qua identidem ponis Calculum ad
numeros Meritorum. Vt, serò decreta delataq; Virtutibus

præmia videri possint, qui tam citò Saluti Patriæ prouiderē
& scires, & posses. Citarem itaque ad Pontificiæ Potestatis
Tuæ Comitæ Maiores Tuos, nullis non Reipubl. functos
Honoribus & Defunctos; nisi adessent Superstites, quæ iure
Sanguinis, quæ usu Contubernij; quæ Officio propinquitatis,
Tuo Honori assurgentes. Adsunt Tuis Illustria Parentelis
Territoria. Adest non vacuo PRAZMOVIANÆ
Virtutis Nomine GABRIEL Terrarum Varsaviæ Notarius,
Tuæ Suxque Felicitati subscribens, Die Dierum Auspicatissimâ
in chirographo pectorum connotatâ. Occurrit præcurritq;
JOANNES PRAZMOWSKI, Terrori Gratiaq; immistus, Illum ferro acuens,
hanc Nomenclatione adstruens; aucturus Fraternalis Amoris excubias,
manu, & Gladio pro Lege & Rege certaturus.

Adest geminatâ Virtutibus Nobilitate, Fraternali Sui
Pontificis Amori, Honoriq; respondens FRANCISCUS
PRAZMOWSKI Cathedralibus Craci Aris ritè Appositus
Præpositusque, vnicè Gratulatus: Mereri Te apud Maiores
Tuos non modicum; tum ex Prosapiæ Decoribus per Te auctis;
tum quòd Gentis Tuæ Vestigium posueris in fastigio Gloriæ
non illis inaccessio. Benè prouidenterq; germanum (breui)
Comparem, immensi (qui Tuus est) Laboris in partem adlegisti,
Agendarum Regendarumq; Rerum prorsus Nobile adiuumentum;
non tam Necessitudini indulgens, quàm Hereditariæ (quæ præpollet)
Prudentiæ præfusus innixusque. Cui Maiora de se quotidie pollicenti
præstantique; (vt quondam Tibi) Industriæ sumus Honor,
Judicium Principis, Suffragium Principis Meruisse; vt Votorum
Compos, Principi debeat Gratiam, Sibi Causam.

Supereſt iam, Sacrandæ Illustrissimo ac Reuerendissimo
CONSECRATORI Tuo pagina, Suam Amplificationem Nomini
Tuo, Operam Studiumque, obuiâ inuitanteq; Humanitate
Consecranti. Quàm lætum Illi, Administrationem Religionis
manu Dicatum Deductumque Te, eo locari in fastigio,
Vnde, tantum supra cæteros ascensu emineres, quantum
infra Te, acclini Modestiam descendisses. Et quidni, per
Sacra Lætæque Enceniorum Tripudia, Loco Dignitateq; cederet

deret? qui nuper Tibi (altiùs Ascensurus) Pro-Cancellarij Munere decessisset? Annulum, Fidei Indicem Arrhamque ad Aras non traderet? qui eidem Tibi Sigillarem Regni Gemmam (alio Dotandus Annulo) tradidisset.

Nec absque Numine actum reor, vt antiquissima Antistitum Cracouiensium Arx, Tuæ Inaugurationis Famâ clarior, Magno Hospite impleretur. Pertinebat enim ad prima Initiati Pontificatûs Tui Sacra, Exsecratio Fœderati Incolatûs, ibi nuper Sedem ac Propugnacula figentis, perenni obliuione, abolenda. Vt quòd residuum isthic erat Militaris Fascini aut Maleficij, Sacro deinceps Mystarum Carmine ritè excantatum, tenues vanesceret in auras. Quantò nunc Tutior, quantò Securior eadem Arx, postquam non Crudelitatis sed Amicitiae Excubijs, non statione Militum Tuta timentium (vt est pavidum semper scelus) sed Hospitum Celebritate defenditur. *Maximum enim est Munimentum Munimento non egeve.* Fidissima omnium Custodia, vbi Omnia non iam plurimo Terrore vt olim, sed meliore Sanctioreque *Colligatarum Mentium* VINCULO Fœderantur. Quid igitur Religiosissimo DEDICATORI Tuo precer aliud? Nisi vt semper Obliget. semperque Obligetur, qui Te, Sibi Collegam, Nobis PONTIFICEM, inter Fasciarum Tæniarumque vincula obligauit ad Aras.

Extremum est, quod Emeritæ Fidei Tuæ incumbit Probatissime ANTISTES: Fouere Iudicium Principis, quod de Te habet: Eundemque Locum Laboris & Curæ, quem Reuerentiæ Dignitatisque retinere. Fauet ille Suis in Te Beneficijs, additurus etiam Perpetuitatem Muneri, nisi eam aliundè flagitandam nôffet. *Tanta illi ad Bene-faciendum Vis, vt Indulgentiam Necessitas amuletur!*

Quamobrem, circumfusus vndique, nunc Senatûs nunc Equestris Coronæ flore, collata in Suam Vniûs Salutem Vota Omnium Vnus audiat habeatq;: Vt, si Rempubicam ex Men-

te, & Vtilitate Omnium Ordinum moderatur;
Si Eius Incolumitatem, si Gubernacula in Tu-
telam Coelestium, recepta esse, vel Fato Hostium
compertum est: vt finem facerent spirandi,
quotquot in Eius Patriæque interitum Conspi-
râssent, sperâssentque se in turbido Piscatu-
ros. Primum ex Regni (quod barbarè appe-
tierant) finibus eiekti, dein è vitæ Statio-
ne proturbâti. Si denique Scipso quoti-
die Admirabilior Meliorque appa-
ret, vt Diu Feliciterque
Contingat:

Illi Patriam, Illum Patriæ Supereffe.



r;
u-
m
,
i-
u-
e.

